



全五代詩
附補遺

六





全 五 代 詩

附 補 遺

(六)

李 調 元 編



叢書集成

初編

主編者
王雲五

商務印書館發行

全五代詩卷三十一

南唐

張義方

義方始名元達。李昇受吳禪，用為侍御史。上疏論風憲，賜衣一襲，以旌直言。取前朝王義方名以易之。故義方得盡忠極諫，官至勤政殿學士，病瘖卒。

南唐近事。義方常令道士陳友合丹於牛頭山，丹灶下有巨虺，火吻錦鱗，蜿蜒其間，若為神物護持。

義方取丹自餌，瘖瘖而終，識者以為氣未盡服之，陰者不壽也。

奉和聖製元日大雪登樓

恰當歲日紛紛落，天寶瑤花助物華。自古最先標瑞牒，有誰輕擬比楊花。密飄粉署光同冷，靜壓青松勢欲斜。豈但小臣添興詠，狂歌醉舞一家家。

查文徽

文徽字光慎，歙州休寧人。南唐時李璟以取閩功，拜撫州觀察使，建州留後，為吳越所擒，遣還。

中毒歸十年，乃卒。

查文徽與馮延巳、馮延魯、陳覺、魏岑等皆以邪佞用事，吳人謂之五鬼。

寄麻姑仙壇道士

別後相思鶴信稀。郡樓南望遠峯迷。人歸仙洞雲連地。花落春秋水滿溪。白髮只應悲鏡鑷。丹砂猶待寄刀圭。方平車駕今何在。常苦塵中日易西。

李徵古

徵古袁州宜春人。南唐昇元末舉進士第。官樞密副使。坐宋齊邱黨賜死。

南唐近事。徵古少時賤。游常宿同郡潘長史家。是夜

潘妻夢門前有儀注鞍馬。擁劍鑼銜隊約二百人。或坐或立。且云太守在此。洎見乃寓宿秀才。覺後言于潘曰。此客非常人也。妾來晨略見。錢酒一鐘。贈之金扼腕曰。郎君他日富貴。慎勿相忘。明年至京成名。不二十年。自樞密副使除本州刺史。

離闕日。元宗賜

內庫酒二百瓶。

登祝融峯一本訛作李古詩。

欲上祝融峯。先登古石橋。鑿開巖嶮處。取路到丹霄。

潘佑

佑幽州人。南唐時累官虞部員外郎內史舍人。著有滎陽集。

野客叢書。前輩謂深院無人杏花雨之句極佳。此非四雨之數。當作去聲呼。此句正祖南

唐潘祐之意。祐有詩曰。誰家舊宅春無主。深院簾垂杏花雨。佑兩句意此作一句言耳。然佑句作上聲。非去聲也。其下曰。香飛綠瑣人未歸。巢燕承塵點無語。豈語字亦當作去聲耶。唐花間集亦曰。紅窗寂無人語。黯淡梨花雨。魯直詩趁此花開須

一醉明朝化作玉塵飛。出于潘佑勸君此醉直須歡。明朝又是從狼籍之意。法藏碎金予記。太白有詩云。野禽啼杜宇。山蝶舞莊周。後又見潘佑有感懷詩。幽禽喚杜宇。宿蝶夢莊周。席地一尊酒。思與元化浮。但莫孤明月。何必秉燭游。予謂才思暗合。古今無殊。不可怪也。太白夜懷有句云。宴坐寂不動。大千入毫髮。潘佑獨坐有句云。凝神入混茫。萬象成空虛。予愛二子吐詞精敏之力。入道深密之狀。合而書之。聊資己用。江南野錄。潘佑有文而容陋。其妻右僕射嚴續之女。有絕態。一日晨粧。佑潛窺於鏡臺。面落鏡中。妻怖遽倒。佑怒其惡己。因棄之。馬令南唐書曰。佑母方娠。夢古衣冠人告曰。我顏延之也。與夫人爲子。及生。七歲始能語。曰。兒悞傷白龍。爲上帝所罰也。因吟詩云。朝遊滄海東。暮歸何太速。祇因騎折白龍腰。謫向人間三十六。後果上書極諫。李煜下獄。自縊死。年三十六歲。

送許處士堅往茅山

天壇雲似雪。玉洞水如琴。白雪與流水。千載清人心。君攜布囊去。路長風滿林。一入華陽洞。千秋那可尋。

送人往宣城

江畔送行人。千山生暮氛。謝安團扇上。爲畫敬亭雲。

失題

誰家舊宅春無主。深院簾垂杏花雨。香飛綠瑣人未歸。巢燕承塵默無語。

馬致恭

致恭南唐時人。

送孟賓于

曾聞洛陽綴神仙。火樹南樓幾十年。白首自忻丹桂在。詩名已得四方傳。行隨秋渚將歸雁。吟傍梅花欲雪天。今日還家莫惆悵。不同初上渡頭船。

包穎

穎南唐時人。

騎省集。茲有和表弟包穎見寄序云。此子侍親在饒州。累年臥疾。詩云。常思帝里奉交親。別後光陰屈指頻。蘭佩卻歸綸閣下。荆枝猶寄楚江濱。十程山水勞幽夢。滿院烟花醉別人。料得此生強健在。會須重賞

昔年春。穎得

詩和之云。

和徐鼎臣見寄

平生中表最情親。浮世那堪聚散頻。謝朓卻吟歸省閣。劉楨猶自臥漳濱。舊游半似前生事。要路多逢後進人。且喜新吟報強健。明年相望杏園春。

鍾謨

謨字仲益。其先會稽人。徙閩之崇安。已而僑居金陵。李璟時為翰林學士。進禮部侍郎。判尚書

省。

談苑。鍾謨建安人。為李景奉表于周。孫晟遇害。獨赦謨為耀州司馬。有詩與州將云云。後劃江為界。世宗召為衛尉卿。放還。因作詩以獻。略云。三年耀武羣雄伏。一日回鑾萬國春。南北通歡永無事。謝恩歸去老陪臣。世宗悅。

貽耀州將

翩翩歸盡塞垣鴻。隱隱驚開蟄戶蟲。渭北離愁春色裏。江南家事戰塵中。還同逐客紉蘭佩。誰聽縲囚奏土風。多謝賢侯振吾道。免令搔首泣途窮。

代京妓越賓答徐鉉

一幅輕綃寄海濱。越姑長感惜時恩。欲知別後情多少。點點憑君看淚痕。

何昌齡

昌齡。南唐時廬陵宰。

總龜昌齡宰廬陵郡。有衙將楊克儉能媚州牧而移其權。昌齡以兄事之。嘗游其池館。貽其詩曰云云。未幾克儉連延範貸死而刑。其家破焉。議者以爲其詩之讖也。

題楊克儉池館

經旬因雨不重來。門有蛛絲徑有苔。再向白蓮臺上望。不知花木爲誰開。

李羽

羽廬州人。登南唐進士第。

獻江淮郡守盧公

塞詔東來淝水濱。時情惟望秉陶鈞。將軍一陣爲功業。忍見沙場百戰人。

梁藻

藻字仲華。長汀人。南唐總殿前步軍暉之子。性樂蕭散。應襲父任。不就。所著有處士集若干卷。

南山池

翡翠戲翻荷葉雨。鷺鷥飛破竹林煙。時沾村酒臨軒酌。擬摘新茶靠石煎。

韓垂

垂南唐時人。

詩話。垂咏金山詩最得名。李建勳有咏金山絕句云。不嗟白髮曾遊此。不歎征帆無了期。盡日憑闌誰會我。只悲不見韓垂詩。

題金山

靈山一峯秀。岌然殊衆山。盤根大江底。插影浮雲間。雷霆常間作。風雨時往還。象外懸清影。千載長躋攀。

朱存

存金陵人。

十國春秋。保大時。存常取吳大帝及六國興亡成敗之迹。作覽古詩二百章。章四句。地志家多援以爲證。

後湖

雷轟疊鼓火翻旗。三異翩翩試水師。驚起黑龍眠不得。狂風猛雨不多時。

陳彥

彥南唐人。官司門郎中。

騎省集。徐鉉有九月十一日寄陳郎中詩云。我多吏事君多病。寂絕過從又幾旬。前日龍山烟景好。風前落帽是何人。彥答之云云。

和徐舍人九月十一日見寄

衡門寂寂逢迎少。不見仙郎向五旬。莫問龍山前日事。菊花開卻爲閑人。

伍 喬

喬廬江人。南唐李璟時至金陵。舉進士第一。仕至考功員外郎卒。著有集。

陸書本傳。喬性嗜學。以淮人無出己右者。遂渡江居

廬山國學。詩調寒苦。每有疲童羸馬之歎。苦節自奮。一夕見人掌自牖隙入。暑讀易二字。忽不見。喬大歎異。輒取易讀之。探索精微。越數年。山中浮屠夢仰視見一大星。芒色甚異。旁有人指之曰。此伍喬星也。入金陵。舉進士試。畫八卦賦。霽後望鍾

山詩。故中選者。主司必延之陞堂置酒。時有宋貞觀者。首就坐。張洎續。主司覽其文。揖貞觀南坐。引洎坐於西。酒數行。喬始上卷。主司歎其傑作。乃徙貞觀處席北。洎處席南。以喬居賓席。及覆試。勝出。喬果爲首。洎貞觀次。時稱主司精於衡覽。

全唐詩話。喬有省試霽後望鍾山句云。積靄沉諸壑。微雲在
半峯。又雲。傍水村凝片冷。雪連山驛積寒光。俱爲人傳誦。

僻居謝何明府見訪

公退琴堂動逸懷。閑披烟靄訪微才。馬嘶窮巷蛙聲息。轍到衡門草色開。風引柳花當坐起。日將林影入庭來。滿齋塵土一床蘚。多謝從容水飯回。

遊西山龍泉禪寺

疊巘層峯坐可觀。枕門流水更潺湲。曉鐘聲徹洞溪遠。夏木影籠軒檻寒。幽徑乍尋衣履潤。古堂頻宿夢魂安。因嗟城郭營營事。不得長遊空鬢殘。

僻居秋思寄友人

門巷秋歸更寂寥。雨餘閑砌委蘭苗。夢迴月夜蟲吟壁。病起茅齋藥滿瓢。澤國舊遊關遠思。竹林前會負佳招。身名未立猶辛苦。何許流年晚鬢凋。

九江旅夜寄山中故人

弱柳風高遠漏沈。坐來難便息愁吟。江城雪盡寒猶在。客舍燈孤夜正深。塵土積年粘族服。關山無處寄歸心。此時遙羨閑眠侶。靜掩雲扉臥一林。

廬山書堂送祝秀才還鄉

束書辭我下重巔。相送同行楚岸邊。歸思幾隨千里雁。離情空寄一林蟬。園林到日酒初熟。庭戶開時月正圓。莫使蹉跎戀疎野。男兒酬志在當年。

龍潭張道者

碧洞幽巖獨息心。時人何處得相尋。養生不說憑諸藥。適意唯聞在一琴。石徑掃稀山蘚合。竹軒開晚野雲深。他年功就期飛去。應笑吾徒多苦吟。

寄落星史虛白處士

白雲峯下古溪頭。曾與提壺爛熯遊。登閣共看彭蠡水。圍爐相憶杜陵秋。棋元不厭通霄算。句妙多容隔歲酬。別後相思時一望。暮山空碧水空流。

題西林寺冰閣

竹翠苔花透檻濃。此亭幽致詎曾逢。水分林下清冷派。山峙雲間峭峻峯。怪石夜光寒射燭。老杉秋韻冷和鐘。不知來往留題客。誰約重尋蓮社蹤。

觀華夷圖

別手應難及此精。須知攢簇自心靈。始於毫末分諸國。漸見圖中列四溟。關路欲伸通楚勢。蜀山俄聳入秦青。筆端盡現寰區事。堪把長懸在戶庭。

晚秋同何秀才溪上

閑步秋光思杳然。荷藜因共過林煙。期收野藥尋幽路。欲採溪菱上小船。雲吐晚陰藏霽岫。柳含餘靄咽殘蟬。倒尊盡日忘歸處。山磬數聲敲暝天。

寄張學士洎

詩史。喬與洎友善。洎爲學士。喬爲通判。作詩以寄。戒僕曰。俟遊宴時投之。僕如言。張得詩動容。爲言于上。召還爲員外。

不知何處好消憂。公退攜壺卽上樓。職事久參侯伯幕。夢魂長遶帝王州。黃山向晚盈軒翠。黟水含春繞檻流。遙想玉堂多暇日。花時誰伴出城遊。

冬日道中

去去天涯無定期。瘦童羸馬共依依。暮煙江口客來絕。寒葉嶺頭人住稀。帶雪野風吹旅思。入雲山火照

行衣釣臺吟閣滄州在。應爲初心未得歸。

僻居酬友人

僻居雖愛近林泉。幽徑閑居碧蘚連。向竹掩扉隨鶴息。就溪安石學僧禪。古琴帶月音聲亮。山果經霜氣味全。多謝故交憐朴野。隔雲時復寄佳篇。

宿瀟山

一入仙山萬慮寬。夜深寧厭倚虛欄。鶴和雲影宿高木。人帶月光登古壇。芝朮露濃溪塢白。薜蘿風起殿廊寒。更陪羽客論真理。不覺初鐘叩曉殘。

遊西禪

遠岫當軒列翠光。高僧一衲萬緣忘。碧松影裏地長潤。白藕花中水亦香。雲自雨前生淨石。鶴于鐘後宿長廊。遊人戀此吟終日。盛暑樓臺早有涼。

寄史處士

長羨閑居一水湄。吟情高古有誰知。石樓待月橫琴久。漁浦經風下釣遲。僻塢落花多掩徑。舊山殘燒幾侵籬。松門別後無消息。早晚重應躡屐隨。

送江少府授延陵後寄

五老雲中勤學者。遇時能不困風塵。束書西上謁明主。捧檄南歸慰老親。別館友朋留醉久。去程烟月入

吟新莫因官小慵之任。自古鸞棲有異人。

觀山水障子

功績精妍世少倫。圖時應陪用心神。不知草木承何異。但見江山長帶春。雲勢似離巖底石。浪花如動岸邊蘋。更疑獨泛漁舟者。便是其中舊隱人。

聞杜牧赴闕

舊隱匡廬一草堂。今聞攜策謁吾皇。峽雲難卷從龍勢。古劍終騰出土光。開翅定期歸碧落。濯纓寧肯問滄浪。他時得意交知仰。莫忘裁詩寄釣鄉。

林居喜崔三博遠至

幾日區區在遠程。晚煙林徑喜相迎。姿容雖有塵中色。巾屨猶多嶽上清。野石靜排爲坐榻。溪茶深煮當飛觥。留連話與方經宿。又欲攜書別我行。

暮冬送何秀才毘陵

疋馬嘶風去思長。素琴孤劍稱戎裝。路途多是過殘歲。杯酒無辭到醉鄉。雲傍水村凝冷片。雪連山驛積寒光。毘陵城下饒嘉景。同日新詩應滿堂。

孫咸

咸南唐人

總龜咸長于預知災異因遊廬山留題九
天使者廟不逾數年金陵板蕩並應此詩

題九天使者廟

獨入元宮禮至真。焚香不為賤貧人。
秦淮兩岸沙埋骨。滙浦千家血染塵。
廬岳烟霞誰是主。虎溪風月屬何人。
九江太守勤王事。好放天兵渡要津。

成彥雄

彥雄字文幹。南唐進士。梅嶺集五卷。

吟窗雜錄彥雄句云。莎草放茵深護砌。海榴噴火巧橫牆。又紋鱗引子跳銀海。紫燕呼雛語畫梁。

杜鵑花

杜鵑花與鳥。怨豔兩何賒。疑是口中血。滴成枝上花。
一聲寒食夜。數朵野僧家。謝豹出不出。日遲遲又斜。

江上楓

江楓自翦鬱。不競松筠力。一葉落漁家。殘陽帶秋色。

夜夜曲

自從君去夜。錦幌孤蘭麝。欹枕對銀缸。秦箏綠窗下。

村行

曖曖村煙暮。牧童出深塢。騎牛不顧人。吹笛尋山去。

會友不至

王孫還是負佳期。玉馬追遊日漸西。獨上郊原人不見。鷓鴣飛過落花溪。

暮春日宴溪亭

寒食尋芳遊不足。溪亭還醉綠楊煙。誰家花落臨流樹。數片殘紅到檻前。

曉

列宿回元朝北極。爽神晞露滴樓臺。佳人卷箔臨階砌。笑指庭花昨夜開。

夕

臺榭沈沈禁漏初。麝煙紅蠟透蝦鬚。雕籠鸚鵡將棲宿。不許鴟鬚轉轆轤。

露

銀河昨夜降醍醐。灑遍坤維萬象蘇。疑是鮫人曾泣處。滿池荷葉捧真珠。

遊紫陽宮

古殿煙霞簇畫屏。直疑蹤跡到蓬瀛。碧桃滿地眠花鹿。深院松窗擣藥聲。

元日

詩話。彥雄有除夜詩云。銅龍看卻送春來。莫惜顛狂酒百杯。吟鬢就中專癡白。那堪更被二更催。又元日詩云。

戴星先捧祝堯觴。鏡裏填驚兩鬢霜。好是燈前偷失笑。屠蘇應不得先嘗。

寒夜吟

洞房脈脈寒宵永。燭影香消金鳳冷。病兒睡覺喚不醒。滿窗撲落銀蟾影。

柳枝辭

輕籠小徑近誰家。玉馬追風翠影斜。愛把長條惱公子。惹他頭上海棠花。
鵝黃剪出小花鈿。綴上芳枝色轉鮮。飲散無人收拾得。月明階下伴鞦韆。
綠楊移傍小亭栽。便擁穠煙撥不開。誰把金刀爲刪掠。放教明月入窗來。
遠接關河高接雲。雨餘洗出半天津。牡丹不用相輕薄。自有清陰覆得人。
王孫宴罷曲江池。折取春光伴醉歸。怪得美人爭鬪乞。要他穠翠染羅衣。
東君愛惜與先春。草澤無人處也新。委囑露華並細雨。莫教遲日惹風塵。
句踐初迎西子年。琉璃爲帚掃溪烟。至今不改當時色。留與王孫繫酒船。
掩映鶯花媚有餘。風流才調比應無。朝朝奉御臨池上。不羨青松拜大夫。
殘照林梢嫋數枝。能招醉客上金堤。馬嬌如練纓如火。瑟瑟陰中步步嘶。

煎茶

岳寺春深睡起時。虎跑泉畔思遲遲。蜀茶倩箇雲僧碾。自拾枯松三四枝。

松

大夫名價古今聞。盤屈孤貞更出羣。將謂嶺南閑得了。夕陽猶挂數枝雲。

新燕

纔離海島宿江濱。應夢笙歌作近鄰。減省雕梁並頭語。畫堂中有未歸人。

惜花

忘餐爲戀滿枝江。錦帳頻移護晚風。客散酒酣歸未得。欄邊獨立月明中。

中秋月

王母粧成鏡未收。倚闌人在水精樓。笙歌莫占清光盡。留與溪翁一釣舟。

韓 漑

漑南唐人

吟窗雜錄。漑有句云。門掩落花人別後。牕含殘月酒醒時。

潯陽觀水

朝宗漢水接陽臺。嗒呀填坑吼作雷。莫見九江平穩去。還從三峽嶮巖來。南經夢澤寬浮日。西出岷山劣泛杯。直至滄溟涵貯盡。沈深不動浸昭回。

水

方圓不定性空求。東注滄溟早晚休。高截碧塘長耿耿。遠飛青嶂更悠悠。瀟湘月浸千年色。夢澤烟含萬

古愁別有嶺頭嗚咽處。爲君分作斷腸流。

松

倚空高檻冷無塵。往事閒徵夢欲分。翠色本宜霜後見。寒聲偏向月中聞。啼猿想帶蒼山雨。歸鶴應和紫府雲。莫向東園競桃李。春光還是不容君。

柳

雪盡青門弄影微。暖風遲日早鶯歸。如憑細葉留春色。須把長條繫落暉。彭澤有情還鬱鬱。隋堤無主自依依。世間惹恨偏饒此。可是行人折贈稀。

竹

樹色連雲萬葉開。王孫不厭滿庭栽。凌霜盡節無人見。終日虛心待鳳來。誰許風流添興詠。自憐瀟灑出塵埃。朱門處處多閑地。正好移陰覆翠苔。

鵲

纔見離巢羽翼開。盡能輕颺出塵埃。人間樹好紛紛占。天上橋成草草回。幾度送風臨玉戶。一時傳喜到粧臺。若教顏色如霜雪。應與清平作瑞來。

燈

分影由來恨不同。綠窗孤館兩何窮。熒煌短焰長疑暗。零落殘花旋委空。幾處隔簾愁夜雨。誰家當戶怯

秋風莫言明滅無多重。曾比人生一世中。

李翱

翱南唐詩人。

郎瑛七修類藁孫魴作金山詩自夸。則不當也。若以驚濤濺佛身。言山不應如此之低。此疑人前又不可說。夢第同時李翱亦有詩。而後四句全同孫句。不知當時何意同之若是。金山志案。此則南唐別有一

李翱耳。今並

載以俟考。

金山寺

萬古波心寺。金山名日新。天多剩得月。地少不生塵。石室堪容膝。雲堂可憩身。我來登眺處。能有幾閒人。

徐道暉

道暉南唐時人。

金山寺

兩寺今爲一。僧多外國人。流來天際水。截斷世間塵。鴉宿昏林徑。龍歸遶塔輪。卻宜成片石。曾坐謝心身。

全五代詩卷三十二

南唐

李中

中字有中隴西人仕南唐爲淦陽宰著有碧雲集

五代詩話孟賓于集序云有中緣情入妙麗則可知出示全編備多奇句如乾坤一夕雨草木萬方春懷古云歌舞

一場夢烟波千古愁聽鄭道士琴云秋月空山寂淳風一夜生徐司徒池亭云扶疎皆竹樹冷淡似瀟湘落花云酷恨西園雨生憎南陌風寄左偃云烟火人家遠汀洲暮雨寒秋雨云秋聲在梧葉潤氣逼書幃廬山云谷春攢錦繡石潤疊瓊琳江行夜泊云半夜風雷過一天星斗寒寄劉鈞云閑花半落處幽客未來時得故人消息云夢歸殘月曉信到落花時訪龍光謙上人云相留看山雪盡日論風騷又七言如宿廬山白雲峯重過道者院云雲開碧落星河近月出滄溟世界秋又海上從事秋日書懷云千里夢隨殘月斷一聲蟬送早秋來又夜泊寄詩友云魚龍不動澄江遠烟霧皆收皎月高東林寺贈遠大師云杉檜已依靈塔老烟霞空鎖影堂深登毗陵青山樓有感云千里吳山青不斷一邊遼海浸無窮訪洞仙宮不遇邵道者云羽客不知何處去洞前花落立多時憶溪居云杜若菰蒲烟雨歇一溪春色屬何人又六言如半落銅壘月曉亂飄金谷風多客中春思云又聽黃鳥綿蠻月斷家鄉未還春水引將客夢悠悠繞遍關山賦泉云誰當秋霽後獨聽月明中素月流天澄江如練對滄洲而援筆乏麗藻以當仁故以公五七言兼六言詩凡二百篇目曰碧雲集癸酉天祐十年八月五日序

寒江暮泊寄左偃

維舟蘆荻岸。離恨若爲寬。烟火人家遠。汀洲暮雨寒。天涯孤夢去。蓬底一燈殘。不是憑騷雅。相思寫亦難。

春日作

和氣來無象。物情還暗新。乾坤一夕雨。草木萬方春。染水烟光媚。催花鳥語頻。高臺曠望處。歌詠屬詩人。

訪蔡文慶處士留題

幽人棲息處。一到滌塵心。蘚色花陰闊。棋聲竹徑深。籬根眠野鹿。池面戲江禽。多謝相留宿。開樽拂素琴。

姑蘇懷古

闔閭興霸日。繁盛復風流。歌舞一場夢。烟波千古愁。樵人歸野徑。漁笛起扁舟。觸目牽傷感。將行又駐留。

書王秀才壁

茅舍何寥落。門庭長綠蕪。貧來賣書劍。病起憶江湖。對枕暮山碧。伴吟涼月孤。前賢多晚達。莫嘆有霜鬚。

春日野望懷故人

野外登臨望。蒼蒼烟景昏。暖風醫病草。甘雨洗荒村。雲散天邊野。潮迴島上痕。故人不可見。倚杖役吟魂。

宿山店書懷寄東林令圖上人

一宿山前店。旅情安可窮。猿聲鄉夢後。月影竹窗中。南楚征途闊。東吳舊業空。虎溪蓮社客。應笑此飄蓬。

江行夜泊

扁舟倦行役。寂寂宿江干。半夜風雷過。一天星斗寒。潮平沙觜沒。霜苦雁聲殘。漁父何疎逸。扣舷歌未闌。

三四孟實子評云。恐
怖一場。虛明徹境。

寄劉鈞秀才

掩戶當春晝。知君志在詩。閑花半落處。幽客未來時。野鳥穿莎徑。江雲過竹籬。會須明月夜。與子水邊期。

聽鄭羽人彈琴

仙鄉景已清。仙子啓琴聲。秋月空山寂。淳風一夜生。莎間蟲罷響。松頂鶴初驚。因感浮華世。誰憐太古情。

落花

年年三月夢。無計惜殘紅。酷恨西園雨。生憎南陌風。片隨流水遠。色逐斷霞空。悵望叢林下。悠悠飲興窮。

得故人消息

多難分離久。相思每淚垂。夢歸殘月曉。信到落花時。未必乖良會。何當有後期。那堪樓上望。烟水接天涯。

江村晚秋作

高秋水村路。隔岸見人家。好是經霜葉。紅於帶露花。臨罾魚易得。就店酒難賒。吟興何能盡。風清日又斜。

芳草

二月正綿綿。離情被爾牽。四郊初過雨。萬里正鋪烟。眷戀殘花惹。留連醉客眠。飄香是杜若。最憶楚江邊。

春晏寄從弟德潤

相思禁烟近。樓上動吟魂。水國春寒在。人家暮雨昏。朱橋通竹樹。香徑匝蘭蓀。安得吾宗會。高歌醉一尊。

秋雨

竟日聲蕭颯。兼風不暫闌。竹窗秋睡美。荻浦夜漁寒。地僻苔生易。林疎鳥宿難。誰知苦吟者。坐聽一燈殘。

烈祖孝高挽歌

誰解叩乾關。音容去不還。位方尊北極。壽忽殞南山。鳳輦應難問。龍髯不可攀。千秋遺恨處。雲物鎖橋山。

贈海上觀音院文依上人

煙霞海邊寺。高臥出門慵。白日少來客。清風生古松。虛窗從燕入。壞屐任苔封。幾度陪師話。相留到暮鐘。

庭竹

偶自山僧院。移歸傍砌栽。好風終日起。幽鳥有時來。篩月牽詩興。籠煙伴酒杯。南窗睡輕起。蕭颯雨聲迴。

江南重會友人

江南重會面。聊話十年心。共立黃花畔。空驚素髮侵。斜陽浮遠水。歸鳥下疎林。牽動詩魔處。涼風村落砧。

送人南遊

浪跡天涯去。南荒必動情。草青虞帝廟。雲暗夜郎城。越鳥驚鄉夢。蠻風解宿醒。早思歸故里。華髮等閑生。

吉水寄閣侍御

時公調
官瀑川

何處懷君切。令人欲白頭。偶尋花外寺。獨立水邊樓。不得論休戚。何因校獻酬。吟餘興難盡。風笛起漁舟。

寄廬岳鑿上人

岳寺樓銜錫。常人親亦難。病披青衲重。晚剃白髭寒。烘壁茶煙暗。填溝木葉乾。昔年皆禮謁。頻到碧雲端。

姑蘇

蘇臺蹤跡在。曠望向江濱。往事誰堪問。連空草自春。花疑西子臉。濤想伍胥神。吟盡情難盡。斜陽照路塵。

依韻和蓋澤王去微秀才見寄

咫尺風騷客。難諧面繼酬。相思對煙雨。一雁下汀洲。花影誰家塢。笛聲何處樓。檣笳朗吟罷。搔首獨遲留。

送孫孔二秀才遊廬山

廬山多勝景。偏稱二君遊。松徑蒼苔合。花陰碧澗流。傾壺同坐石。搜句共登樓。莫學天臺客。逢山卽駐留。

途中聞子規

春殘杜宇愁。越客思悠悠。雨歇孤村裏。花飛遠水頭。微風聲漸咽。高樹血應流。因此頻迴首。家山隔幾洲。

訪龍光智謙上人

忽起尋師興。穿雲不覺勞。相留看山雪。盡日論風騷。竹影搖禪榻。茶烟上毳袍。夢魂曾去否。舊國阻波濤。

賦得江邊草

岸春芳草合。幾處思纏綿。向暮江籬雨。初晴杜若煙。靜宜幽鷺立。遠稱碧波連。送別王孫處。萋萋南浦邊。

江行晚泊寄湓城知友

孤舟相憶久。何處倍關情。
野渡帆初落。秋風蟬一聲。
江浮殘照闊。雲散亂山橫。
漸去湓城遠。那堪新月生。
思舊遊有感

長憶銜杯處。醅醕尙未闌。
江南正夜雨。樓上恰春寒。
好樹藏鶯密。平蕪徹野寬。
如今無處覓。音信隔波瀾。
秋日途中

竹林已蕭索。客思正如讐。
舊業吳江外。新蟬楚驛頭。
遙天疎雨過。列岫亂雲收。
今夕誰家宿。孤吟月色秋。
書蔡隱士壁

病後霜髭出。衡門寂寞中。
蠹侵書帙損。塵覆酒樽空。
池暗菰蒲雨。徑香蘭蕙風。
幽閑□□趣。不見卜窮通。
訪徐長史留題水閣

君家池閣靜。一到且淹留。
坐聽蒹葭雨。如看島嶼秋。
杯盤深有興。吟笑迴忘憂。
更愛幽奇處。雙雙下野鷗。
鸕鶿

流品是鴛鴦。翻飛雲水鄉。
風高離極浦。煙暝下方塘。
比鷺行藏別。穿荷羽翼香。
雙雙浴輕浪。誰見在瀟湘。
所思

離思春來切。誰能慰寂寥。
花飛寒食過。雲重楚山遙。
耿耿夢徒往。悠悠鬢易凋。
那堪對明月。獨立水邊橋。
春閨辭二首

卷簾遲日暖。睡起思沈沈。遼海音塵遠。春風旅館深。疎篁留鳥語。曲砌轉花陰。寄語長征客。流年不易禁。不得遼陽信。春心何以安。烏啼窗樹曉。夢斷碧煙殘。綠鑑開還懶。紅顏駐且難。相思誰可訴。時取舊書看。

臘中作

冬至雖云遠。渾疑朔漠中。勁風吹大野。密雪翳高空。泉凍如頑石。人藏類蟄蟲。豪家應不覺。獸炭滿爐紅。

贈胸山楊宰

訟閑微賦畢。吏散捲簾時。聽雨入秋竹。留僧覆舊棋。得詩書落葉。煮茗汲寒池。化俗功成後。煙霄會有期。

悼亡

巷深芳草細。門靜綠楊低。室邇人何處。花殘月又西。武陵期已負。巫峽夢終迷。獨位銷魂久。雙雙好鳥啼。

贈致仕沈彬郎中

自言婚嫁畢。塵事不關心。老去詩魔在。春來酒病深。山翁期採藥。海月伴鳴琴。多謝維舟處。相留接靜吟。

寄王鶚秀才

長憶狂遊日。惜春心恰同。預愁花片落。不遣酒壺空。草軟眠難捨。鶯嬌德莫窮。如今千里隔。搔首對秋風。

宿山中寺

寄宿深山寺。惟逢老病僧。風吹幾世樹。雲暗暮秋燈。瞑目忘塵慮。談空入上乘。明晨返名路。何計戀南能。

海上載筆依韻酬左偃見寄

都城分別後。海嶠夢魂迷。吟興疎煙月。邊情起鼓鼙。戍旗風颭小。營柳霧籠低。草檄無餘刃。難將阮瑀齊。

送黃一作王秀才

雨餘飛絮亂。相別思難任。酒罷河橋晚。帆開煙水深。蟾宮須展志。漁艇莫牽心。歧路從茲遠。雙魚信勿沈。

哭舍弟

浮生多天枉。惟爾最堪悲。同氣未歸日。慈親臨老時。舊詩傳海嶠。舍弟有詩云。夢斷海山遠。夜長風雨多。傳至海上。新塚枕江湄。遺稚

嗚嗚處。黃昏繞總帷。

書情寄詩友

默默誰知我。裴回野水邊。詩情長若舊。吾事更無先。芳草人稀地。殘陽雁過天。靜思吟友外。此意復誰憐。

喜春雨有寄

青春終日雨。公子莫思晴。任阻西園會。且觀南畝耕。最憐滋壟麥。不恨溼林鶯。父老應相賀。豐年兆已成。

魏夫人壇

仙壇遺跡在。苔合落花明。絳節何年返。白雲終日生。旋新芳草色。依舊偃松聲。欲問希夷事。音塵隔上清。

寄贈致仕沈彬郎中

鶴氅換朝服。逍遙雲水鄉。有時乘一葉。載酒入三湘。塵夢年來息。詩魔老亦狂。蓴羹與鱸膾。秋興最宜長。

書小齋壁

其誰肯見尋。冷淡少知音。塵土侵閑榻。煙波隔故林。竹風醒晚醉。窗月伴秋吟。道在唯求己。明時豈陸沈。

懷王道者

閑思王道者。逸格世難羣。何處眠青嶂。從來愛白雲。酒沾應獨醉。藥熟許誰分。正作趨名計。如何得見君。

依韻和智謙上人送李相公赴昭武軍

暫別廟堂上。雄藩去豁情。秋風生雁渚。晚霧溼龍旌。吟裏過候服。夢中歸帝城。下車軍庶樂。千里月華清。

春日途中作

干祿趨名者。迢迢別故林。春風短亭路。芳草異鄉心。雨過江山出。鶯啼村落深。未知將雅道。何處謝知音。

遊元真觀

閑吟遊古觀。靜慮想神仙。上景非難度。陰功不易全。醮壇松作蓋。丹井蘚成錢。浩浩紅塵裏。誰來叩自然。

寄左偃

每病風騷路。荒涼人莫遊。惟君還似我。成癖未能休。捨寐緣孤月。忘形爲九秋。垂名如不朽。那恨雪生頭。

獻中書韓舍人

丹墀朝退後。靜院卽冥搜。盡日捲簾坐。前峯當檻秋。烹茶留野客。展畫看滄洲。見說東林夜。尋常秉燭遊。

訪山叟留題

策杖尋幽客。相攜入竹扃。野雲生晚砌。病鶴立秋庭。茶美睡心爽。琴清塵慮醒。輪蹄應少到。門巷草青青。

漁父

煙冷暮江濱。高歌散誕身。移舟過蓼岸。待月正絲綸。亦與樵翁約。同遊酒市春。白頭雲水上。不識獨醒人。

贈上都紫極宮劉日新先生

道德吾君重。含貞本去華。因知鍊神骨。何必在煙霞。棋散庭花落。詩成海月斜。瀛洲舊仙侶。應許寄丹砂。

勉同志

讀書與磨劍。旦夕但忘疲。儻若功名立。那愁變化遲。塵從侵硯席。苔任滿庭墀。明代搜揚切。升沈莫問龜。

離亭前思有寄

酒醒江亭客。纏綿恨別離。笙歌筵散後。風月夜長時。耿耿看燈暗。悠悠結夢遲。若無騷雅分。何計達相思。

秋夕書事寄友人

信斷關河遠。相思秋夜深。砌蛩聲咽咽。簷月影沈沈。未遂青雲志。那堪素髮侵。吟餘成不寐。徹曙四鄰砧。

依韻酬智謙上人見寄

性拙才非逸。同心友亦稀。風昏秋病眼。霜溼夜吟衣。鶯谷期猶負。蘭陔養不違。吾師惠佳句。勝得楚金歸。

題柳

折向離亭畔。春光滿手生。羣花豈無豔。柔質自多情。夾岸籠溪月。兼風撼野鶯。隋隄三月暮。飛絮想縱橫。

江館秋思因成自勉

江邊候館幽。汀鳥暝煙收。客思雖悲月。詩魔又愛秋。聲名都是幻。窮達未能憂。散逸憐漁父。波中漾小舟。

聽蟬寄胸山孫明府

忽聽新蟬發。客情其奈何。西風起槐柳。故國阻煙波。壠笛悲猶少。巴猿恨未多。不知陶靖節。還動此心麼。

江南春

千家事勝遊。景物可忘憂。水國樓臺晚。春郊煙雨收。鷓鴣啼竹樹。杜若媚汀洲。永巷歌聲遠。王孫會莫愁。

秋夕病中作

臥病當秋夕。悠悠枕上情。不堪拋月色。無計避蟲聲。煎藥惟憂澁。停燈又怕明。曉臨清鑑裏。應有白鬕生。

春日書懷寄胸山孫明府

一作邊城客。閑門兩度春。鶯花深院雨。書劍滿牀塵。紫閣期終負。青雲道未伸。猶憐陶靖節。詩酒每相親。

春晚招魯從事

衰衰利名役。常嗟聚會稀。有心遊好景。無術駐殘暉。南陌草爭茂。西園花亂飛。期君舉杯酒。不醉莫言歸。

和易秀才春日見寄

每恨多流落。吾徒不易親。相逢千里客。共醉百花春。小檻山當面。閑塔柳拂塵。何時卜西上。明月桂枝新。

送戴秀才

已是殊鄉客。送君重慘然。河橋乍分首。槐柳上鳴蟬。短櫂離幽浦。孤帆觸遠煙。清朝重文物。變化莫遷延。

病中作

閑齋病初起。心緒復悠悠。開篋羣書蠹。聽蟬滿樹秋。詩魔還漸動。藥債未能酬。爲憶前山色。扶持上小樓。

江南重會友友人感舊

長江落照天。物景似當年。憶昔攜村酒。相將上釣舡。狂歌紅蓼岸。驚起白鷗眠。今日趨名急。臨風一黯然。

全五代詩卷三十三

南唐

李中二

己未歲冬捧宣頭離下蔡

詔下如春煦。巢南志不違。空將感恩淚。滴盡冒寒衣。覆載元容善。形骸果得歸。無心慚季路。負米覲親闈。

哭舍弟

鴻雁辭羣後。成行憶日存。誰知歸故里。只得奠吟魂。蟲蠹書盈篋。人稀草擁門。從茲長慟後。獨自奉晨昏。

讀蜀志

鼎分天地日。先主力元微。魚水從相得。山河遂有歸。任賢無間忌。報國盡神機。草昧爭雄者。君臣似此稀。

都下再會友人

誰言多難後。重會喜淹留。欲話關河夢。先驚鬢髮秋。浮雲空冉冉。遠水自悠悠。多謝開青眼。攜壺共上樓。

晉陵縣夏日作

事簡公庭靜。開簾暑氣中。依經煎綠茗。入竹就清風。至論招禪客。忘機憶釣翁。晚涼安枕簟。海月出牆東。

郵亭蚤起

郵舍殘燈在。村林雞唱頻。星河吟裏曉。川陸望中春。舊友青雲貴。殊鄉素髮新。悠悠念竹計。難更駐征輪。

客中寒食

旅次經寒食。思鄉淚溼巾。音書天外斷。桃李雨中春。欲飲都無緒。唯吟似有因。輸他郊郭外。多少踏青人。

旅館秋夕

寥寥山館裏。獨坐酒初醒。舊業多年別。秋霖一夜聽。砌蛩聲漸息。窗燭影猶停。蚤晚無多事。休如泛水萍。

宿青溪米處士幽居

寄宿溪光裏。夜涼高士家。養風窗外竹。叫月水中蛙。靜慮同搜句。清神旋煮茶。唯憂晚雞唱。塵裏事如麻。

送張惟貞少府之江陰

相送煙汀畔。酒闌登小舟。離京梅雨歇。到邑早蟬秋。俗必期康濟。詩誰互唱酬。晚涼諸吏散。海月入虛樓。

送姚端先輩歸寧

知君歸覲省。稱意涉通津。解纜汀洲曉。張帆煙水春。棗吟芳草遠。貫酒亂花新。拜慶庭闈處。蟬枝香滿身。

吉水作尉時酬閣侍御見寄

謬佐驅雞任。常思賦鵬人。未諧林下約。空感舊來身。鑠徑青苔老。鋪階紅葉新。相思不可見。猶喜得書頻。

吉水作尉酬高援秀才見贈

佐邑慙無術。敢言貧與清。風騷誰是主。煙月自關情。卷箔當山色。開窗就竹聲。憐君惠嘉句。資我欲垂名。

送智雄上人

忽起游方念。飄然不可留。未知攜一錫。乘興向何州。古岸春雲散。遙天晚雨收。想應重會面。風月又清秋。

覽友人卷

新詩開卷處。造化竭精英。雪霽楚山碧。月高湘水清。初吟塵慮息。再挹古風生。自此寰區內。喧騰二雅名。

廣陵寒食夜

廣陵寒食夜。豪貴足佳朝。紫陌人歸後。紅樓月上時。綺羅香未歇。絲竹韻猶遲。明日踏青興。輸他輕薄兒。

寄廬山莊隱士

煙蘿擁竹關。物外自求安。逼枕溪聲近。當簷岳色寒。藥苗應自採。琴調對誰彈。待了浮名後。依君共挂冠。

王昭君

蛾眉翻自累。萬里陷窮邊。滴淚胡風起。寬心漢月圓。飛塵長翳日。白草自連天。誰貢和親策。千秋污簡編。

送汪濤

知君別家後。不免淚霑襟。芳草千里路。夕陽孤客心。花飛當野渡。猿叫在煙岑。霄漢知音在。何須恨陸沈。

言志寄劉鈞秀才

童穉親儒墨。時平喜道存。酬身指書劍。賦命委乾坤。秋爽鼓琴興。月清搜句魂。與君同此志。終待至公論。

經古寺

殿宇半隳摧。門臨野水開。雲凝何代樹。草蔽此時臺。遶塔堆黃葉。沿階積綠苔。踟躕日將暮。棲鳥入巢來。

送王道士遊東海

巨浸常牽夢。雲遊豈覺勞。遙空收晚雨。虛閣看秋濤。必若思三島。應須釣六鼇。如通十洲去。誰信碧天高。

閑居言懷

未達難隨衆。從他俗所憎。閑聽九秋雨。遠憶四明僧。病後倦吟嘯。貧來疎友朋。寂寥元合道。未必是無能。

宿鍾山知覺院

宿投林下寺。中夜覺神清。磬罷僧初定。山空月又生。籠燈吐冷豔。岳樹起寒聲。待曉紅塵裏。依前冒遠程。

旅夜聞笛

長笛起誰家。秋涼夜漏賒。一聲來枕上。孤客在天涯。木末風微動。窗前月漸斜。暗牽詩思苦。不獨落梅花。

送紹明上人之毘陵

忽起毘陵念。飄然不可留。聽蟬離古寺。攜錫上扁舟。月出沙汀冷。風高葦岸秋。回期端的否。千里路悠悠。

遙賦義興潛泉

見說靈泉好。潺湲興莫窮。誰當秋霽後。獨聽月明中。澗石苔花潤。隨流木葉紅。何當化霖雨。濟物顯殊功。

舟次吉水逢蔡文慶秀才

別後音塵斷。相逢又共吟。雪霜今日鬢。烟月舊時心。艤櫂夕陽在。聽鴻秋色深。一尊開口笑。不必話升沈。

清溪逢張惟貞秀才

洞隱紅霞外。房開碧嶂根。昔年同鍊句。幾夜共聽猿。考古書千卷。忘憂酒一樽。如今歸建業。雅道喜重論。

送閣侍御歸闕

羨君乘紫詔。歸路指通津。鼓櫂煙波煖。還京雨露新。趨朝丹禁曉。聳轡九衢春。自愧湮沈者。隨軒未有因。

舟次彭澤

飄泛經彭澤。扁舟思莫窮。無人秋浪晚。一岸蓼花風。鄉里夢漸遠。交親書未通。今宵見圓月。難坐冷光中。

泉

潺潺青嶂底。來處一何長。漱石苔痕滑。侵松鶴夢涼。泛花穿竹塢。瀉月下蓮塘。想得歸何處。天涯助渺茫。

和毘陵尉曹昭用見寄

決獄多餘暇。冥搜萬象空。卷簾疏雨後。鑱印夕陽中。還往多名士。編題尙古風。宦途知此味。能有幾人同。

新喻縣偶寄彭仁正字

經年離象魏。孤宦在南荒。酒醒公齋冷。雨多歸夢長。志難酬國澤。術欠致民康。吾子應相笑。區區道未光。

和彭正字喜雪見寄

千門忻應瑞。偏稱上樓看。密灑虛窗曉。狂飄大野寒。園深宜竹樹。簾捲洽杯盤。已作豐年兆。黎民意盡安。

貽毘陵正勤禪院奉長老

隨緣住瓶錫。心已悟無生。默坐煙霞散。閑觀水月明。竹深風倍冷。堂迴磬偏清。願作傳燈者。忘言學淨名。

新秋有感

門巷涼秋至。高梧一葉驚。漸添衾篔簹。頓覺夢魂清。暗促蓮開豔。乍催蟬發聲。雨降炎氣減。竹引冷烟生。戍客添歸思。行人怯遠程。未逢征雁下。漸聽夜砧鳴。張翰思鱸興。班姬詠扇情。音塵兩難問。蛩砌月空明。

舟中望九華山

排空蒼翠異。輟掉看崔嵬。一面雨初歇。九峯雲正開。當時思水石。便欲上樓臺。隱去心難遂。吟餘首懶迴。僧休傳紫閣。屏歇寫天台。中有忘機者。逍遙不可陪。

廬山

控壓潯陽景。崔嵬古及今。勢雄超地表。翠盛接天心。湓浦春煙列。星灣晚景沈。圖經宜細覽。題詠卒難任。靖節門遙對。庾公樓俯臨。參差含積雪。隱映見歸禽。峭拔推雙劍。清虛數二林。白蓮池宛在。翠輦事難尋。天近星河冷。龍歸洞穴深。谷春攢錦繡。石潤疊瓊琳。元鶴傳仙拜。青猿伴客吟。泉通九江遠。雲出幾州陰。冬有靈湯溢。夏無炎暑侵。他年如遂隱。五老是知音。

徐司徒池亭

亭榭跨池塘。泓澄入座涼。扶疎皆竹柏。冷淡似瀟湘。萍嫩鋪波面。苔深鎖岸傍。朝迴遊不厭。僧到賞難忘。最稱收殘雨。偏宜帶夕陽。吟堪期謝朓。醉好命嵇康。奢侈心難及。清虛趣最長。月明垂釣興。何必憶滄浪。

題徐五教池亭

多士池塘好。塵中景恐無。年來養鷗鷺。夢不去江湖。泉脈通深澗。風聲起短蘆。驚魚跳藻荇。戲蝶上菰蒲。泛泛容魚艇。閒閒載酒壺。漲痕山雨過。翠積岸苔鋪。花影沈波底。煙光入座隅。燒香憐杜若。夜浸愛蟾蜍。步逸心難厭。看吟興不辜。馮君命奇筆。爲我寫成圖。

獻喬侍郎

位望誰能並。當年志已伸。人間傳鳳藻。天上演龍綸。賈馬才無敵。褒雄譽益臻。除姦深繫念。致主迴忘身。諫疏縱橫上。危言果敢陳。忠貞雖貫世。消長豈由人。慷慨辭朝闕。迢遙涉路塵。千山明夕照。孤棹渡長津。杜宇聲方切。江籬色正新。卷舒唯合道。喜愠不勞神。禪客陪清論。漁翁作近隣。靜吟窮野景。狂醉養天真。格論思名士。輿情渴直臣。九霄恩復降。比戶意皆忻。卻入鴛鸞序。終身顧問頻。漏殘丹禁曉。日暖玉墀春。鑒物心如水。憂時鬢若銀。惟期康庶事。永要敍彝倫。貴賤知無間。孤寒必許親。幾多沈滯者。拭目望陶鈞。

獻中書潘舍人

運叶半千數。天鍾許國臣。鵬霄開羽翼。鳳闕演絲綸。顧問當清夜。從容向紫宸。立言成雅誥。正意敍彝倫。朴素偕前哲。馨香越搢紳。褒辭光萬代。優旨重千鈞。公退誰堪接。清閒道是隣。世閒身屬幻。物外意通津。弔往兼春夢。文高賦復新。琴彈三峽水。屏畫十洲春。庭冷鋪苔色。池寒浸月輪。竹風來枕簟。藥氣上衣巾。茶譜傳溪叟。棋經受羽人。清虛雖得趣。獻替不妨陳。杞梓呈才後。神仙入侍頻。孤寒皆有賴。中外亦同忻。

有士曾多難。無門得望塵。忙忙罹險阻。往往耗精神。尋果巢枝願。終全負米身。遭逢敦孝治。蹇蹇值通津。最慶清朝祿。還霑白髮親。甘柔心既逐。虛薄報何因。遠宦聯綿歷。卑棲夙夜勤。良時空愛惜。末路每悲辛。骨立駒猶病。顏彫女尙貧。而今借顧遇。尺蠖願求伸。

獻中書張舍人

仙桂從攀後。人間播大名。飛騰諧素志。霄漢是前程。持憲威聲振。司言品秩清。簾開春酒醒。月上草麻成。丹陛凌晨對。青雲逐步生。照人裘玉瑩。鑒物憲陂明。下直無他事。閑遊恣逸情。林僧開戶接。溪叟掃苔迎。煮茗山房冷。垂綸野艇輕。神清宜放曠。詩苦益縱橫。餘刃時皆仰。嘉謀衆佇行。四方觀啓沃。畢竟念孤平。

獻徐舍人

清名喧四海。何止並南金。奧學羣英伏。多才萬乘欽。秩參金殿峻。步歷紫微深。顧問承中旨。絲綸演帝心。褒雄饒義路。賈馬避詞林。下直無他事。開門對遠岑。軒窗來晚吹。池沼歇秋霖。薜點生棋石。茶煙過竹陰。希夷元已達。躁競豈能侵。羽客閒陪飲。詩人伴靜吟。自慙爲磔物。多幸辱虛襟。此日重遭遇。心期出陸沈。

寄廬山白大師

長憶尋師處。東林寓泊時。一秋同看月。無夜不論詩。泉美茶香異。堂深磬韻遲。鹿馴眠薜逕。猿苦叫霜枝。別後音塵隔。年來鬢髮衰。趨名方汲汲。未果再遊期。

冬日書懷寄惟真太師

自別吾師後。風騷道甚孤。雪霜侵鬢髮。音信隔江湖。擾擾悲時世。悠悠役夢途。向公期盡節。多病怕傾壺。賤跡雖慙滯。幽情忍使辜。詩成天外句。棋覆夜中圖。落壁燈花碎。飄牕雪片麤。煮茶燒栗興。早晚復圍爐。

送孫霽書記赴壽陽辟命

辟命羨君赴。其如愴別情。酒闌汀樹晚。帆展野風生。淮靜寒煙斂。村遙夜火明。醉沈胸嶺夢。吟達壽春城。舊友搖鞭接。元戎掃榻迎。雪晴蓮幕啓。雲散桂山橫。王粲從軍畫。陳琳草檄名。知君提健筆。重振此嘉聲。

雲

悠悠離洞壑。冉冉上天津。捧日終爲異。從龍自有因。高行四海雨。暖拂萬山春。靜與霞相近。閒將鶴最親。帝鄉歸莫問。楚殿夢曾頻。白向封中起。碧從詩裏新。冷容橫釣浦。輕縷絆蟾輪。不滯濃還淡。無心卷復伸。非煙聊擬議。千里在逡巡。會作五般色。爲祥覆紫宸。

秋雨

竟日散如絲。吟看半掩扉。秋聲在梧葉。潤氣逼書幃。曲澗泉承去。危簷燕帶歸。寒蛩悲旅壁。亂蘚滑漁磯。爽欲除幽篔。涼須換熟衣。疏蓬誰夢斷。荒徑獨遊稀。偏稱江湖景。不妨鷗鷺飛。最憐爲瑞處。南畝稻苗肥。

私友人喜雪

騰雪頻頻降。成堆不可除。伴吟花莫並。銷瘴藥何如。謝女詩成處。袁安睡起初。深迷樵子徑。冷遍旅人居。惹砌催罇俎。飄牕入簿書。最宜樓上望。散亂滿空虛。

庭葦

品格清於竹。詩家景最幽。從栽向池沼。長似在汀洲。玩好招溪叟。棲堪待野鷗。影疏當夕照。花亂正深秋。韻細堪清耳。根牢好繫舟。故溪高岸上。冷淡有誰遊。

對酒招陳昭用

花開葉落堪悲。似水年光暗移。身世都如夢役。是非空使神疲。良圖有分縱在。所欲無勞妄思。幸有一壺清酒。且來閒話希夷。

贈東林白大師

虎溪久駐靈蹤。禪外詩魔尙濃。卷箔吟銷永日。移牀坐對千峯。蒼苔冷鎖幽徑。微風間生古松。自說年來老病。出門漸覺疏慵。

寄楊先生

仙翁別後無信。應共烟霞卜隣。莫把壺中祕訣。輕傳塵裏遊人。浮生日月自急。上境鶯花正春。安得一招琴酒。與君共泛天津。

落花

殘紅引動詩魔。懷古牽情奈何。半落銅臺月曉。亂飄金谷風多。悠悠旋逐流水。片片輕粘短莎。誰見長門深鎖。黃昏細雨相和。

全五代詩卷三十四

南唐

李中三

和夏侯秀才春日見寄

綿蠻黃鳥不堪聽。觸目離愁怕酒醒。雲散碧山當晚檻。雨催青蘚匝春庭。尋芳懶向桃花塢。垂釣空思杜若汀。晝夢不成吟有興。揮毫書在枕邊屏。

宿廬山白雲峯重道者院

絕頂松堂喜暫遊。一宵元論接浮丘。雲開碧落星河近。月出滄溟世界秋。塵裏年光何急急。夢中強弱自悠悠。他時書劍酬恩了。願遂鸞車看十洲。

海上從事秋日書懷

悠悠旅宦役塵埃。舊業那堪信未迴。千里夢隨殘月斷。一聲蟬送早秋來。壺傾濁酒終難醉。匣鎖青萍久不開。唯有搜吟遣懷抱。涼風時復上高臺。

春晚過明氏閑居

寥寥陋巷獨扃門。自樂清虛不厭貧。數局棋中消永日。一罇酒裏送殘春。雨催綠蘚鋪三徑。風送飛花入

四鄰羨爾朗吟無外事。滄洲何必去垂綸。

題柴司徒亭假山

疊石峨峨象翠微。遠山魂夢便應稀。從教蘚長添峰色。好引泉來作瀑飛。螢影夜攢疑燒起。茶煙朝出認雲歸。知君創得茲幽致。公退吟看到落暉。

秋江夜泊寄劉鈞正字

閑憶詩人思倍勞。維舟清夜泥風騷。魚龍不動澄江遠。雲霧皆收皎月高。潮滿釣舟迷浦嶼。霜繁野樹叫猿猱。此時吟苦君知否。雙鬢從他有二毛。

柴司徒宅牡丹

暮春欄檻有佳期。公子開顏乍拆時。翠幄密籠鶯未識。好香難掩蝶先知。願陪妓女爭調樂。欲賞賓朋預課時。只恐卻隨雲雨去。隔年還是動相思。

贈王道者

混俗從教鬢似銀。世人無分得相親。槎流海上波濤闊。酒滿壺中天地春。功就不看丹竈火。性閑時拂玉琴塵。仙家變化誰能測。只恐洪崖是此身。

登毗陵青山樓

高樓閑上對晴空。豁日開襟半日中。千里吳山清不斷。一邊遼海浸無窮。人生歌笑開花霧。世界興亡落

葉風吟罷倚欄何限意。回頭城郭暮煙籠。

桃花

祇應紅杏是知音。灼灼偏宜間竹陰。幾樹半開金谷曉。一溪齊綻武陵深。豔舒百葉時皆重。子熟千年事莫尋。誰步宋牆明月下。好香和影上衣襟。

贈史虛白

致主嘉謀尙未伸。慨然深志與誰論。喚迴古意琴開匣。陶出真情酒滿樽。明月過溪吟釣艇。落花堆席睡僧軒。九重夢卜時終在。莫向深雲獨閉門。

送致仕沈彬郎中遊茅山

掛卻朝冠披鶴氅。羽人相伴恣遨遊。忽因風雅思茅嶺。便挈琴樽上葉舟。野寺宿時山月上。海門吟處水雲秋。華陽洞府年光永。莫向仙鄉擬駐留。

獻張義方常侍

雄飛看是逼崑廊。逸思常聞不暫忘。公署靜眠思水石。古屏閑展看瀟湘。老來酒病雖然減。秋杪詩魔更是狂。乘興有時招羽客。橫琴移月啓茅堂。

贈永真一作貞杜翺少府

藍袍竹簡佐琴堂。縣僻人稀覺日長。愛靜不嫌官況冷。苦吟從聽鬢毛蒼。閑尋野寺聽秋水。寄睡僧窗到夕陽。騫翥會應霄漢去。漁竿休更戀滄浪。

送廬阜僧歸山隄

山陽舊杜終經夢。容易言歸不可留。瓶貯瀑泉離五老。錫搖江雨上孤舟。魚行細浪分沙觜。雁逆高風下葦洲。遙想枚臯宅邊寺。不知涼月共誰遊。

投所知

孤琴塵翳劍慵磨。自顧泥蟠欲柰何。千里交親消息斷。一庭風雨夢魂多。題橋未展相如志。叩角誰憐甯戚歌。唯賴明公憐道在。敢攜篋笠釣煙波。

贈上都先業大師

懶向人前著紫衣。虛堂閑倚一條藜。雖承雨露居龍闕。終憶煙霞夢虎溪。睡起曉窗風淅淅。病來深院草萋萋。有時乘興尋師去。煮茗同吟到日西。

海城秋日書懷寄胸山孫明府

槐柳蟬聲起渡頭。海城孤客思悠悠。青雲展志知何日。皓月牽吟又入秋。鑑裏漸生潘岳鬢。風前猶著卜商裘。鳴琴良宰揮毫士。應笑蹉跎身未酬。

贈胸山孫明府

縣庭無事似山齋。滿砌青青旋長苔。閑撫素琴曹吏散。自烹新茗海僧來。買將病鶴勞心養。移得閑花用意栽。幾度訪君留我醉。甕香皆值酒新開。

贈海上書記張濟員外

鵬霄休歎志難伸。貧病雖縈道且存。阮瑀不能專筆硯。嵇康唯要樂琴尊。春風滿院空欹枕。芳草侵階獨閉門。劍有塵埃書有蠹。昔年心事共誰論。

經古觀有感

古觀寥寥枕碧溪。偶思前事立殘暉。漆園化蝶名空在。柱史猶龍去不歸。丹井泉枯苔鎖合。醮壇松折鶴來稀。回頭因嘆浮生事。夢裏光陰疾若飛。

秋日登潤州城樓

虛樓一望極封疆。積雨晴來野景長。水接海門鋪遠色。稻連京口發秋香。鳴蟬歷歷空相續。歸鳥翩翩自著行。吟罷倚欄深有思。清風留我到斜陽。

晚春客次偶吟

暫駐征輪野店間。悠悠時節又春殘。落花風急宿醒解。芳草雨昏春夢寒。慙逐利名頭易白。欲眠雲水志猶難。卻憐村寺僧相引。閑上虛樓共倚欄。

書郭判官幽齋壁

不妨公退尙清虛。翫得幽齋興有餘。要引好風清戶牖。旋栽新竹滿庭除。傾壺待客花開後。煮茗留僧月上初。更有野情堪愛處。石牀苔蘚似匡廬。

石棋局獻時宰

得從岳叟誠堪重。卻獻臯夔事更宜。公退啓枰書院靜。日斜收子竹陰移。適情豈待樵柯爛。罷局還應屐齒墮。預想幽窗風雨夜。一燈閑照覆圖時。

海城秋夕寄懷舍弟

烏棲庭樹夜悠悠。枕上誰知淚暗流。千里夢魂迷舊業。一城砧杵搗殘秋。窗閑寂寂燈猶在。簾外蕭蕭雨未休。早晚萊衣同著去。免悲流落在邊州。

獻張拾遺

官資清貴近丹墀。性格孤高世所稀。金殿日開親鳳扆。古嶼時展看漁磯。酒醒虛閣秋簾捲。吟對疎篁夕鳥歸。獻替頻陳忠譽播。鵬霄萬里展雄飛。

贈夏秀才

軒車紫陌競尋春。獨掩衡門病起身。步月怕傷三徑蘚。取琴因拂一牀塵。明時儻有丹枝分。青鑑從他素髮新。況是青雲知己在。原思生計莫憂貧。

海上春夕旅懷寄左偃

柳過清明絮亂飛。感時懷舊思悽悽。月生樓閣雲初散。家在汀洲夢去迷。髮白每慙清鑑啓。酒醒長怯子規啼。北山高臥風騷客。安得同吟復杖藜。

安福縣秋吟寄陳銳祕書

縣庭事簡得餘功。詩興秋來不可窮。臥聽寒螿莎砌月。行衝落葉水村風。愁髭漸去人前白。醉面猶憐鑑裏紅。苦恨交親多契闊。未知良會幾時同。

暮春有感寄宋維員外

杜宇聲中老病心。此心無計駐光陰。西園雨過好花盡。南陌人稀芳草深。喧夢卻嫌鶯語老。伴吟惟怕月輪沈。明年才候東風至。結駟期君預去尋。

題吉水縣廳前新栽小松

斷開幽澗蘚苔斑。移得孤根植砌前。影小未遮官舍月。翠濃猶帶舊山煙。羣花解笑香寧久。衆木雖高節不堅。輸我婆娑欄檻內。晚風蕭颯學幽泉。

代別

明日鳴鞭天一涯。悠悠此夕怯分離。紅樓有恨金波轉。翠黛無言玉筍垂。浮蟻不能迷遠意。迴紋從此寄相思。花時定是慵開鑑。獨向春風忍掃眉。

宿臨江驛

候館寥寥輟權過。酒醒無奈旅愁何。雨昏郊郭行人少。葦暗汀洲宿雁多。干祿已悲凋髮鬢。絕茅終愧負煙蘿。篇章早晚逢知己。苦志忘形自有魔。

吉水縣依韻酬華松秀才見寄

官況蕭條在水村。吏歸無事好論文。枕欹獨聽殘春雨。夢去空尋五老雲。竹徑每憐和藪步。禽聲偏愛隔花聞。詩情冷淡知音少。獨喜江臯得見君。

貽廬山清溪觀王尊師

霞帔星冠復杖藜。積年修鍊住靈溪。松軒睡覺冷雲起。石磴坐來春日西。採藥每尋巖徑遠。彈琴常到月輪低。鼎中龍虎功成後。海上三山去不迷。

江次維舟登古寺

輟權因過古梵宮。荒涼門徑鎖苔茸。綠陰滿地前朝樹。清韻含風後殿鐘。童子縱慵眠壞榻。老僧耽話指諸峯。吟餘卻返來時路。迴首盤桓尙駐筇。

秋江夜泊寄劉鈞

萬里江山斂暮煙。旅情當此獨悠然。沙汀月冷帆初卸。葦岸風多人未眠。已聽漁翁歌別浦。更堪邊雁過遙天。與君共俟酬身了。結侶波中寄釣船。

九臯羽翼下晴空。萬里心難駐玉籠。清露滴時翹蕚徑。白雲開處唳松風。歸當華表千年後。怨在瑤琴別操中。好共靈龜作儔侶。十洲三島逐仙翁。

暮春吟懷寄姚端先輩

無奈詩魔旦夕生。更堪芳草滿長汀。故人還爽花前約。新月又生江上亭。莊夢斷時燈欲燼。蜀魂啼處酒初醒。何時得見登龍客。隔卻千山萬仞青。

送圓

一作圖

上人歸廬山

蓮宮舊隱塵埃外。策杖臨風拂袖還。踏雪獨尋青嶂下。聽猿重入白雲間。蕭騷紅樹當門老。斑駁蒼苔鎖徑閑。預想松軒夜禪處。虎溪圓月照空山。

思湓渚舊居

昔歲曾居湓水頭。草堂吟嘯興何幽。迎僧常踏竹間蘚。愛月獨登溪上樓。寒翠入簷嵐岫曉。冷聲繁枕野泉秋。從拘宦路無由到。昨夜分明夢去遊。

留題胡參卿秀才幽居

竹廡庭除蘚色濃。道心安逸寂寥中。扣門時有棲禪客。漉酒多招採藥翁。江近好聽菱芡雨。徑香偏愛蕙蘭風。我慙名宦猶拘束。脫屣心情未得同。

送姚端秀才遊毘陵

毘陵嘉景太湖邊。才子經遊稱少年。風弄青帘沽酒市。月明紅袖採蓮船。若耶罨畫應相似。越岫吳峯盡接連。此去高吟須早返。廣寒丹桂莫遷延。

悼懷王喪妃

花綻花開事可驚。暫來浮世返蓬瀛。楚宮夢斷雲空在。洛浦神歸月自明。香解返魂成浪語。膠能續斷是虛名。音容寂寞春牢落。誰會樓中獨立情。

贈蒯亮處士

著得新書義更幽。負琴何處不遨遊。元宮寄宿月華冷。羽客伴吟松韻秋。滿戶煙霞思紫閣。一帆風雨憶滄洲。吾君側席求賢切。未可懸瓢枕碧流。

題廬山東寺遠大師影堂

遠公遺跡在東林。往事名存動苦吟。杉檜已依靈塔老。煙霞空鎖影堂深。入簾輕吹催香印。落石幽泉雜磬音。十八賢人消息斷。蓮池千載月沈沈。

贈重安寂道者

寒松肌骨鶴心情。混俗陶陶隱姓名。白髮只聞悲短景。紅塵誰解信長生。壺中日月存心近。島外煙霞入夢滿。每許相親應計分。琴餘常見話蓬瀛。

江邊吟

風暖汀洲吟興生。遠山如畫雨新晴。殘陽影裏水東注。芳草煙中人獨行。閃閃酒帘招醉客。深深綠樹隱啼鶯。盤桓漁舍忘歸去。雲靜高空月又明。

寄左偃

蕭條陋巷綠苔侵。何事君心似我心。貧戶懶開元愛靜。病身纔起便思吟。閑留好鳥庭柯密。暗養鳴蛩砌草深。況是清朝重文物。無愁當路少知音。

遊北山洞神宮

悶見塵中光景促。仙鄉來禮紫陽君。人居淡寂應難老。道在虛無不可聞。松檜穩棲三島鶴。樓臺閑鎖九霄雲。羨師向此朝星斗。一炷清香午夜焚。

思簡寂觀舊遊寄重道者

閑憶當年遊物外。羽人曾許駐仙鄉。溪頭烘藥煙霞暖。花下圍棋日月長。偷摘蟠桃思曼倩。化成蝴蝶學蒙莊。俗緣未斷歸浮世。空望林泉意欲狂。

思九江舊居三首

結茅曾在碧江隈。多病貧身養拙來。雨歇汀洲垂釣去。月當門巷訪僧迴。靜臨窗下開琴匣。悶向牀頭潑酒醅。遊宦等閑千里隔。空餘魂夢到漁臺。

門前煙水似瀟湘。放曠優游興味長。虛閣靜眠聽遠浪。扁舟閑上泛殘陽。鶴翹碧蘚庭除冷。竹引清風枕簟涼。犬吠疎籬明月上。隣翁攜酒到茅堂。
無機終日狎沙鷗。得意高吟景且幽。檻底江流偏稱月。簷前山朵最宜秋。遙村處處吹橫笛。曲岸家家繫小舟。別後再遊心未遂。設屏惟畫白蘋洲。

秋夜吟寄左偃

與君詩興素來狂。況入清秋夜景長。溪閣共誰看好月。莎堦應獨聽寒螿。卷中新句誠堪喜。身外浮名不足忙。會約垂名繼前哲。任他元髮盡如霜。

竹

森森移得自山莊。植向空庭野興長。便有好風來枕簟。更無閑夢到瀟湘。廕來砌蘚經疎雨。引下溪禽帶夕陽。閑約羽人同賞處。安排棋局就清涼。

懷廬岳舊遊寄劉鈞因感鑒上人

昔年廬岳間遊日。乘興因尋物外僧。寄宿愛聽松葉雨。論詩惟對竹窗燈。各拘片祿尋分別。高謝浮名竟未能。一念支公安可見。影堂何處暮雲凝。

贈謙明上人

雖寄上都眠竹寺。逸情終憶白雲端。閑登鍾阜林泉晚。夢去沃洲風雨寒。新試茶經煎有興。舊嬰詩病捨

終難常聞秋夕多無寐。月在高臺獨凭欄。

贈鍾尊師遊茅山

筇杖擔琴背俗塵。路尋茅嶺有誰羣。仙翁物外應相遇。靈藥壺中必許分。香入肌膚花洞酒。冷侵魂夢石牀雲。伊予亦有朝修志。異日遨遊願見君。

送胸山孫明府赴壽陽幕府辟命

堪羨元戎虛右席。便承綸綍起金臺。菊叢憔悴陶潛去。蓮幕光輝阮瑀來。好向尊壘陳妙畫。定應書檄播雄才。預愁別後相思處。月入閑窗遠夢迴。

下蔡春偶作

旅館飄飄類斷蓬。悠悠心緒有誰同。一宵風雨花飛後。萬里鄉關夢自通。多難不堪容鬢改。沃愁惟怕酒杯空。採蘭扇枕何時遂。洗慮焚香叩上穹。

再遊洞神宮懷邵羽人有感

重向煙蘿省舊遊。因尋遺跡想浮邱。峯頭鶴去三清遠。壇畔月明千古秋。泉落小池清復咽。雲從高嶠起還收。自慙未得沖虛術。白髮無情漸滿頭。

吉水春暮訪蔡文慶處士留題

無事無憂鬢任蒼。濁醪閑酌送韶光。溟濛雨過池塘暖。狼藉花飛硯席香。好古未嘗疎典冊。懸圖時要看

瀟湘戀君清話難留處。歸路迢迢又夕陽。

暮春懷故人

池館寂寥三月盡。落花重疊蓋莓苔。惜春眷戀不忍掃。感物心情無計開。夢斷美人沈信息。目穿長路倚樓臺。琅玕繡段安可得。流水浮雲共不迴。

對雨寄胸山林番明府

竟日如絲不暫停。莎塔閑聽滴秋聲。斜飄虛閣琴書潤。冷逼幽窗夢寐清。開戶只添搜句味。看山還阻上樓情。遙知公退琴堂靜。坐對蕭騷飲興生。

海上和郎戩員外赴倅職

宋玉逢秋何起悲。新恩委寄好開眉。班升鴛鴦頻經歲。任佐龔黃必暫時。乍對煙霞冷海嶠。應思蘋蓼夢江湄。一朝鳳詔重徵入。鵬化那教尺鷃知。

又送赴關

心似白雲歸帝鄉。暫停良晝別龔黃。煙波乍曉浮蘭櫂。魂夢先飛近御香。一路伴吟汀草綠。幾程清思水風涼。想應敷對忠言後。不放鄉雲離太陽。

送夏侯秀才

江村搖落暮蟬鳴。執手臨歧動別情。古岸相看殘照在。片帆難駐好風生。牽吟一路逢山色。醒睡長汀對

月明。況是清朝至公在。預知喬木定遷鶯。

獻中書湯舍人

慶雲呈瑞爲明時。演暢絲綸在紫微。鑾殿對時親舜日。鯉庭過處著萊衣。閑尋竹寺聽啼鳥。吟倚江樓戀落暉。隔座銀屏看是設。一門清貴古今稀。

晉陵罷任寓居依韻和陳銳秀才見寄

掩門三徑莓苔綠。車馬誰來陋巷間。臥棄琴書公幹病。笑迎風月步兵閑。當秋每謝養清耳。漸老多慙酒借顏。濟物未能伸一術。敢於明代愛青山。

新喻縣酬王仲華少府見貽

事簡開樽有逸情。共忻官舍月華清。每慙花欠河陽景。長愧琴無單父聲。未泰黎元慚曠職。縱行謙直是虛名。與君盡力行公道。敢向昌朝俟陟明。

維舟秋浦逢故人張矩同泊

卸帆清夜碧江濱。冉冉涼風動白蘋。波上正吟新霽月。岸頭恰見故鄉人。共驚別後霜侵鬢。互說年來疾逼身。且飲一壺銷百恨。會須遭遇識通津。

懷舊夜吟寄趙杞

長笛聲中海月飛。桃花零落滿庭墀。魂銷事去無尋處。酒醒孤吟不寐時。萱草豈能忘積恨。尺書誰與達

相思悠悠方寸何因解。明日江樓望渺瀰。

甲子歲罷吉水縣。過鍾陵時暮春維舟江渚。謁柴太尉席上作。

公侯延駐暫踟躕。況值風光三月初。亂落杯盤花片小。靜籠池閣柳陰疎。舟維南浦程雖阻。飲預西園興有餘。卻笑田家門下客。當時容易歎車魚。

哭故主人陳太師

十年孤跡寄侯門。入室升堂忝厚恩。遊遍春郊隨茜旆。飲殘秋月待金尊。車魚鄭重知難報。吐握周旋不可論。長慟裴回逝川上。白楊蕭颯又黃昏。

哭柴郎中

昔歲遭逢在海城。曾容孤跡奉雙旌。酒邊不厭笙歌盛。花下只愁風雨生。棋接山亭松影晚。吟陪月檻露華清。音塵自此無因問。淚灑川波夕照明。

送相里秀才之匡山國子監

氣秀情閑杳莫羣。廬山遊去志求文。已能探虎窮騷雅。又欲囊螢就典墳。目豁乍窺千里浪。夢寒初宿五峯雲。業成早赴春闈約。要使嘉名海內聞。

寄廬山簡寂觀重道者

憶昔採芝廬岳頂。清宮常接絳霄人。玉書閑展石樓曉。瑤瑟醉彈琪樹春。惟恨仙桃遲結實。不憂滄海易

成塵似醒一夢歸凡世。空向彤霞寄夢頻。

海上和柴軍使清明書事

清明時節好煙光。英傑高吟興味長。捧日卽應還禁衛。當春何惜醉胸陽。千山過雨難藏翠。百卉臨風不藉香。卻是旅人悽屑甚。夜來魂夢到家鄉。

全五代詩卷三十五

南唐

李中四

壬申歲承命之任淦陽。再過廬山國學。感舊寄劉鈞。

三十年前共苦辛。囊螢曾寄此煙岑。讀書燈暗嫌雲重。搜句石平憐蘚深。各歷宦途悲聚散。幾看時輩或浮沈。再來物景還依舊。風冷松高猿狖吟。

和胸陽載筆魯裕見寄

燕臺多事每開顏。相許論交淡薄間。飲興共憐芳草岸。吟情同愛夕陽山。露濃小徑蛩聲咽。月冷空庭竹影閑。何事此時攀憶甚。與君俱是別鄉關。

海上太守新剏東亭

使君心智杳難同。選勝開亭景莫窮。高敞軒窗迎海月。預栽花木待春風。靜披典籍堪師古。醉擁笙歌不礙公。滿徑苔紋疎雨後。入簷山色夕陽中。偏宜下榻延徐孺。最稱登門禮孔融。事簡豈妨頻賞翫。況當爲政有餘功。

劍客

恩酬期必報。豈是輒輕生。神劍冲霄去。誰爲平不平。

鶴

驚露精神異。冲天羽翼新。千年一歸日。誰識令威身。

途中柳

翠色晴來近。長亭路去遙。無人折煙縷。落日拂溪橋。

隔牆花

顏色尤難近。馨香不易通。朱門金鎖隔。空使怨春風。

感事呈所知

競愛松筠翠。皆憐桃李芳。如求濟世廣。桑柘願商量。

貽青陽宰

徵賦常登限。名山管最多。吏閑民訟少。時得訪煙蘿。

梅花

羣木方憎雪。開花長在先。流鶯與舞蝶。不見許因緣。

柳絮

年年二月暮。散亂雜飛花。雨過微風起。狂飄千萬家。

早春

一種和風至。千花未放妍。草心并柳眼。長是被恩先。

春雲

陰去爲膏澤。晴來媚曉空。無心亦無滯。舒卷在東風。

客中春思

又聽黃鳥綿蠻。目斷家鄉未還。春水引將客夢。悠悠透遍關山。

所思

門掩殘花寂寂。簾垂斜月悠悠。縱有一庭萱草。何曾與我忘憂。

燕

豪家五色泥香。銜得營巢太忙。喧覺佳人晝夢。雙雙猶在雕梁。

鶯

羽毛特異諸禽。出谷堪聽好音。薄暮欲棲何處。雨昏楊柳深深。

訪洞神宮邵道者不遇

閑來仙觀問希夷。雲滿星壇水滿池。羽客不知何處去。洞前花落立多時。

贈別

行杯酌罷歌聲歇。不覺前汀月又生。自是離人魂易斷。落花芳草本無情。

送劉恭遊廬山兼寄令上人

松桂煙霞蔽梵宮。詩流閑去訪支公。石堂磬斷相逢夜。五老月生谿影空。

春夕偶作

早是春愁觸目生。那堪春夕酒初醒。貫珠聲罷人歸去。半落桃花月在庭。

子規

暮春滴血一聲聲。花落年年不忍聽。帶月莫啼江畔樹。酒醒遊子在離亭。

春日書懷

千峰雪盡鳥聲春。日永孤吟野水濱。霄漢路歧昇未得。花時空拂滿衣塵。

所思代人

巫峽雲深湘水遙。更無消息夢空勞。夢迴深夜不成寐。起立閑庭花月高。

送仙客

危言危行是男兒。倚伏相牽豈足悲。莫向汀洲時獨立。悠悠斜日照江離。

柳二首

春來無樹不青青。似共東風別有情。閑憶舊岩溢水畔。數枝煙雨屬啼鶯。

最愛青青水國中。莫愁門外問花紅。
纖纖無力勝春色。撼起啼鶯恨晚風。
秋夕書懷

功名未立誠非晚。骨肉分飛又入秋。
枕上不堪殘夢斷。壁蛩窗月夜悠悠。

感興

漁休渭水興周日。龍起南陽相蜀時。
不遇文王與先主。經天才業擬何爲。

春曉

殘燭猶存月尙明。幾家幃幌夢魂驚。
星河漸沒行人動。歷歷林梢百舌聲。

都下寒食夜作

香塵未歇暝煙收。城滿笙歌事勝遊。
自是離人睡長早。千家簾卷月當樓。

對竹

懶穿幽徑衝鳴鳥。忍踏清陰損翠苔。
不似閉門欹枕聽。秋聲如雨入軒來。

經廢宅

一夢奢華去不還。斷牆花發豈堪看。
玉纖素綆知何處。金井梧桐碧甃寒。

溪邊吟

瀾瀾雙飛下碧流。蓼花蘋穗正含秋。
茜裙二八採蓮去。笑衝微雨上蘭舟。

憶溪居

竹軒臨水靜無塵。別後鳧鷖入夢頻。杜若菰蒲煙雨歇。一溪春色屬何人。

登下蔡縣樓

長涯煙水又含秋。吏散時時獨上樓。信斷蘭臺鄉國遠。依稀王粲在荊州。

春閨辭

塵昏菱鑑懶修容。雙臉桃花落盡紅。玉塞夢歸殘燭在。曉鶯窗外囀梧桐。邊無音信暗消魂。茜袖香裙積淚痕。海燕歸來門半掩。悠悠花落又黃昏。

離家

送別人歸春日斜。獨鞭羸馬指天涯。月生江上鄉心動。投宿物忙近酒家。

村行

極目青青壠麥齊。野塘波闊下鳧鷖。陽烏景暖林桑密。獨立閑聽戴勝啼。

宮詞二首

門鎖簾垂月影斜。翠華咫尺隔天涯。香鋪羅幌不成夢。背壁銀缸落盡花。金波寒透水精簾。燒盡沈檀手自添。風遞笙歌門已掩。翠華何處夜厭厭。

採蓮女

晚涼含笑上蘭舟。波底紅妝影欲浮。陌上少年休植足。荷香深處不回頭。

鍾陵春思

沈沈樓影月當午。冉冉風香花正開。芳草迢迢滿南陌。王孫何處不歸來。

夏日書依上人壁

門外塵飛暑氣濃。院中蕭索似山中。最憐煮茗相留處。疎竹當軒一榻風。

捧宣頭許歸侍養

泥書捧處聖恩新。許覲庭闈養二親。螻蟻至微寧足數。未知何處答穹旻。

途中作

逢舊識聞老親。所患不至加甚。

烟波涉歷指家林。欲到家林懼卻深。得信慈親痾瘵減。當時寬勉採蘭心。

春苔

春霖催得鎖煙濃。竹院莎齋徑小通。誰愛落花風味處。莫愁門巷襯殘紅。

夏雲

如峰形狀在西郊。未見從龍上泐寥。多謝好風吹起後。化爲甘雨濟田苗。

書夏秀才幽居壁

永巷苔深戶半開。牀頭書劍積塵埃。最憐小檻疏篁晚。幽鳥雙雙何處來。

紅花

紅花顏色掩千花。任是猩猩血未加。染出輕羅莫相貴。古人崇儉誠奢華。

贈念法華經綬上人

五更初起掃松堂。瞑目先焚一炷香。念徹蓮經誰得見。千峰巖外曉蒼蒼。

秋日途中

信步騰騰野岸邊。離家都爲利名牽。疎林一路斜陽裏。颯颯西風滿耳蟬。

宿韋校書幽居

溪上高眠與鶴閑。開樽留我待柴關。園林月白秋霖歇。一夜泉聲似故山。

酒醒

睡覺花陰芳草軟。不知明月出牆東。杯盤狼籍人何處。聚散空驚似夢中。

送虞道士

烟霞聚散通三島。星斗分明在一壺。笑說餘杭沽酒去。蔡家重要會麻姑。

鍾陵禁煙寄從弟

落絮飛花日又西。踏青無侶草萋萋。交親書斷竟不到。忍聽黃昏杜宇啼。

夜泊江渚

水鄉明月上晴空。汀島香生杜若風。不是當年獨醒客。且沽村酒待漁翁。

蛩

月冷莎庭夜已深。百蟲聲外有清音。詩情正苦無眠處。愧爾塔前相伴吟。

感秋書事

宦途憔悴雪生頭。家計相牽未得休。紅蓼白蘋消息斷。舊溪煙月負漁舟。

訪廬山歸禪伯

沈沈石室疎鍾後。寂寂莎池片月明。多少學徒求妙法。要於言下悟無生。

廬山棲隱洞譚先生院留題

壇畔歸雲冷溼襟。拂苔移石坐花陰。偶然醒得莊周夢。始覺元門興味深。

江行值暴風雨

風狂雨暗舟人懼。自委神明志不邪。投得葦灣波浪息。岸頭煙火近人家。

杪秋夕吟懷寄宋維先輩

江島窮秋木葉稀。月高何處搗寒衣。苦嚙不見登龍客。此夜悠悠一夢飛。

七夕

星河耿耿正新秋。絲竹千家列綵樓。可惜穿針方有興。纖纖初月苦難留。

春日招宋維先輩

甕中竹葉今朝熟。鑑裏桃花昨日開。爲報廣寒攀桂客。莫辭相訪共銜杯。

吹笛兒

隴頭休聽月明中。妙竹嘉音際會逢。見爾樽前吹一曲。令人重憶許雲封。

所思

解珮當時在洛濱。悠悠疑是夢中身。自從物外無消息。花謝鶯啼近十春。

吉水縣酬夏侯秀才見寄

啓鑑悠悠兩鬢蒼。病來心緒易淒涼。知音不到吟還懶。鑱印開簾又夕陽。

和潯陽宰感舊絕句五首

追感古今情不已。竹軒閑取史書看。欲親往哲無因見。空樹臨風襟袖寒。
潯陽物景真難及。練瀉澄江最好看。曾上虛樓吟倚檻。五峰擎雪照人寒。
園林春媚千花發。爛熳如將畫障看。惟愛松筠多冷淡。青青偏稱雪霜寒。
知君百里鳴琴處。公退千山盡日看。政化有同風偃草。更將餘力拯孤寒。
昔歲尋芳忻得侶。江堤物景盡情看。就中吟戀垂楊下。撼起啼鶯晚吹寒。

泊秋浦

葦岸風高宿雁驚。維舟特地起鄉情。漁兒隔水吹橫笛。半夜空江月正明。

漁父二首

偶向蘆花深處行。溪光山色晚來晴。漁家開戶相迎接。稚子爭窺犬吠聲。
雪鬢衰髯白布袍。笑攜頰鯉換村醪。殷勤留我宿溪上。釣艇歸來明月高。

旅次聞砧

砧杵誰家夜搗衣。金風淅淅露微微。月中獨坐不成寐。舊業經年未得歸。

思朐陽春遊感舊寄柴司徒五首

王孫昔日甚相親。共賞西園正媚春。醉臥如茵芳草上。覺來花月影籠身。
烟鋪芳草正綿綿。藉草傳杯似列仙。暫輟笙歌且聯句。含毫花下破香牋。
南陌風和舞蝶狂。惜春公子戀斜陽。高歌飲罷將迴轡。衣上花兼百草香。
春郊飲散暮煙收。卻引絲簧上翠樓。紅袖歌長金罍亂。銀蟾飛出海東頭。
昔年常接五陵狂。洪飲花間數十場。別後或驚如夢覺。音塵難問水茫茫。

放鷺鷥

池塘多謝久淹留。長得霜翎放自由。好去蒹葭深處宿。月明應認舊江秋。

敘吟二首

往哲搜羅妙入神。隋珠和璧未爲珍。而今所得慙難繼。謬向平生著苦辛。
成僻成魔二雅中。每逢知己是亨通。言之無罪終難厭。欲把風騷繼古風。

全五代詩卷三十六

南唐

張 佖

佖字子澄。常州人。仕南唐爲考功員外郎。累官至內史舍人。歸宋。官虞部郎中卒。

娜嬛記。佖初與鄰女浣衣相善。

經年不復覩。精神凝一夜。必夢之。嘗寄詩云。酷憐風月爲多情。還到春時別恨生。倚柱尋思倍惆悵。一場春夢不分明。又有句云。多情只有春庭月。猶爲離人照落花。浣衣計無所出。流淚而已。又有經舊遊詩云。暫到高堂曉。又還丁香結。夢水潺潺。不知雲雨歸何處。歷歷空流十二山。又詞云。獨立寒階望月華。露濃香泛小庭花。繡屏愁背一燈斜。雲雨自從分散後。人間無路到仙家。但憑魂夢訪天涯。想皆爲浣衣作。全唐詩錄。後主壬申歲。佖知貢舉。試天雞弄和風。佖但以文選中詩句爲題。未嘗詳究。有進士白云。爾雅。翰。天雞。翰。天雞。未知孰是。佖大驚。不能對。亟取爾雅檢。一在釋蟲。一在釋鳥。果有二。因自失。放進士三人。學士張洎言。佖多遺。復命洎試。放五人。金陵破。後主以藏金私遺近臣。辦裝。佖得金二百。詣曹彬。陳首。請奏其事。彬薄之。以金輸官。而不以聞。十國春秋。太宗朝。佖在史館。一日問曰。卿家每食多客。敘談何事。佖曰。臣之親舊客都下。乏食。故嘗過臣飯。然止菜羹而已。明日太宗遣快行者伺之。果然。喜其不隱。遷官郎中。人稱菜羹張家。佖爲人長者。後官河南。每寒食必親拜後主墓。哭之甚哀。李氏子孫陵替。常分俸贍給焉。按同時有張佖。淮南人。爲句容縣尉。憤國事日非。上書數千言。極諫。後主不納。非此佖也。他書誤作一人者非。

春晚謠

雨微微。烟霏霏。小庭半折紅薔薇。鈿箏斜倚畫屏曲。零落幾行金雁飛。蕭關夢斷無尋處。萬疊春波起南浦。凌亂楊花撲繡簾。晚窗時有流鶯語。

所思

空塘水碧春雨微。東風散漫楊柳飛。依依南浦夢猶在。脈脈高唐雲不歸。江頭日莫多芳草。極目傷心烟悄悄。隔江紅杏一枝明。似玉佳人俯清沼。休向春臺更迴望。銷魂自古因惆悵。銀河碧海共無情。兩處悠悠起風浪。

春江南

雨溟溟。風泠泠。老松瘦竹臨煙汀。空江冷落野雲重。村中鬼火微如星。夜驚溪上漁人起。滴瀝篷聲滿愁耳。子規叫斷獨未眠。罨岸春濤打船尾。

送容州中丞赴鎮

交趾同星坐。龍泉佩斗文。燒香翠羽帳。看舞謁金裙。鷓首衝瀧浪。犀渠拂嶺雲。莫教銅柱北。祇說馬將軍。

碧戶

碧戶高魚鑠。蘭窗掩鏡臺。落花疑悵望。歸燕自裴迴。詠絮知難敵。傷春不易裁。恨從芳草起。愁爲晚風來。衣惹湘雲薄。眉分楚岫開。香濃眠舊枕。夢好醉春盃。小障明金鳳。幽屏點翠苔。寶箏橫塞雁。怨笛落江梅。卓氏仍多酒。相如正富才。莫教琴上意。翻作鶴聲哀。

洞庭阻風

空江浩蕩景蕭然。盡日菰蒲泊釣船。青草浪高三月渡。綠楊花撲一溪烟。情多莫舉傷春日。愁極兼無買酒錢。猶有漁人數家住。不成村落夕陽邊。

春日旅泊桂州

暖風芳草竟芊綿。多病多愁負少年。弱柳未勝寒食雨。好花爭奈夕陽天。溪邊物色堪圖畫。林畔鶯聲似管弦。猶有離人開淚眼。強憑杯酒亦潸然。

晚次湘源縣

煙郭遙聞向晚雞。水平舟靜浪聲齊。高林帶雨楊梅熟。曲岸籠雲謝豹啼。二女廟荒汀樹老。九疑山碧楚天低。湘南自古多離怨。莫動哀吟易慘悽。

惆悵吟

秋風丹葉動荒城。慘澹雲遮日半明。晝夢卻因惆悵得。晚愁多爲別離生。江淹彩筆空留恨。莊叟元譚未及情。千古怨魂銷不得。一江寒浪若爲平。

秋晚過洞庭

征帆初挂酒初酣。暮景離情兩不堪。千里晚霞雲夢北。一洲霜橘洞庭南。溪風送雨過秋寺。礪石驚龍落夜潭。莫把羈魂弔湘魄。九疑愁絕鎖煙嵐。

題華嚴寺木塔

六街晴色動秋光。雨霽憑高只易傷。一曲晚煙浮渭水。半槁斜日照咸陽。休將世路悲塵事。莫指雲山認故鄉。回首漢宮樓閣暮。數聲鐘鼓自微茫。

春夕言懷

風透疎簾月滿庭。倚欄無事倍傷情。煙垂柳帶纖腰軟。露滴花房怨臉明。愁逐野雲銷不盡。情隨春浪去難平。幽窗謾結相思夢。欲化西園蝶未成。

芍藥

香清粉澹怨殘春。蝶翅蜂鬚戀麝塵。閒倚晚風生悵望。靜留遲日學因循。休將薜荔爲青瑣。好與玫瑰作近鄰。零落若教隨暮雨。又應愁殺別離人。

邊上

戍樓吹角起征鴻。獵獵寒旌背晚風。千里暮煙愁不盡。一川秋草恨無窮。山河慘澹關城閉。人物蕭條市井空。只此旅魂招未得。更堪回首夕陽中。

長安道中蚤行

客離孤館一燈殘。牢落星河欲曙天。雞唱未沈函谷月。雁聲新度灞陵烟。浮生已悟莊周蝶。壯志仍輸祖逖鞭。何事悠悠策羸馬。此中辛苦過流年。

惜花

蝶散鶯啼尚數枝。日斜風定更離披。看多記得傷心事。金谷樓前委地時。

寄人

別夢依依到謝家。小廊迴合曲闌斜。多情只有春庭月。猶爲離人照落花。

鄭文寶

文寶字仲賢。寧化人。彥華之子。仕南唐校書郎。歷官宋兵部員外郎。所著有南唐近事。江表志。

談苑

寒夜錄律詩多佳句。惜其全集不傳。郊居云。百草千花路。斜風細雨天。送枝江秦長官云。官嫌容易達。家愛等閑貧。送曹緯云。小舟聞笛夜。微雨養花天。長安別友云。杜曲花香濃似酒。滿陵春色老于人。不減王維杜甫。東都事略。

文寶以詩名家。多警句。善篆。工琴。十國春秋。歸宋後。詔故臣皆許錄用。獨文寶不肯言仕。後主奉朝請。禁絕賓謁。文寶乃披蓑荷笠。作賣魚者。以見寬。警久之。後主爲之感歎。後主卒。乃仕。工詩。其過緱山及題綠野堂。爲晏殊歐陽修所膾炙。四清詩話。緱氏王子晉昇仙之地。有祠在焉。鄭工部文寶題一絕云云。後晏元獻守洛。過見之。取白樂天語書其後云。此詩在處有神物護持。皇朝類苑。文寶有經貶所云。過關已躍樗蒲馬。誤喘猶驚顧兔屏。送人歸湖中云。滿帆西日催行客。一夜東風落楚梅。俱爲人傳誦。蔡寬夫詩話。歐陽文忠公稱仲賢張僕射園中。綠野堂一聯。以爲集中少比。其詩云。沙暖鳧鷖行哺子。蹊深桃李臥開花。

送曹緯劉鼎二秀才

旦夕春風老。離心共黯然。小舟聞笛夜。微雨養花天。手筆人皆有。曹劉世所賢。柳侯重才子。從此看鶯遷。

送枝江秦長官罷秩

衆論才名外。親人似故人。官嫌容易達。家愛等閒貧。解印詩權在。移風澤國春。政聲誣不得。暫見數鄉民。

寒食訪僧

客舍愁經百五春。雨餘溪寺綠無塵。金花開處鞦韆鼓。粉頰誰家鬪草人。水上碧桃流片段。梁間新燕語逡巡。高僧不飲客攜酒。來勸先朝放逐臣。

郢城新亭

每到新亭卽厭歸。野香經雨長松圍。四簷山色消繁暑。一局棋聲下翠微。冰片角巾簪澗月。錦文卷石砌苔磯。近來學得籠中鶴。迴避流鶯笑不飛。

溫泉

潺湲如燎嶺雲陰。玉石魚龍換古今。只見開元無事久。不知貞觀用功深。籠無解語衣無雲。堆有黃沙粟有金。惆悵狐雛負恩澤。始尤夸甫未經心。

讀江總傳

行人慵過景陽宮。宮畔離離禾黍風。庭玉有花空怨白。井蓮無步莫愁紅。吟詩功業才雄大。亡國君臣道最同。爭忍暮年歸故里。綸竿迴避釣魚翁。

闕題

亭亭畫舸繫寒潭。直到行人酒半酣。不管烟波與風雨。載將離恨過江南。

一夜西風旅雁秋。背身調鋏索征裘。關山落盡黃榆葉。駐馬誰家唱石州。
江雲薄薄日斜暉。江館蕭條獨掩扉。梁燕不知人事改。雨中猶作一雙飛。

赴闕日過石子鎮

得罪先朝出粉闈。五原功業更誰知。年深放逐無人識。白雲關頭一望時。

過緱山題王子晉祠

秋陰漠漠秋雲輕。緱氏山頭月正明。帝子西飛仙馭遠。不知何處夜吹笙。

張洎

洎字師黯。改字偕仁。滁州全椒人。仕南唐。知制誥中書舍人。歸宋。爲史館修撰。翰林學士。淳化中。參知政事。卒。所著有賈氏談錄。十國春秋。初洎將後主命入貢。作十詩以詆訾汴京風物。至有一堆灰之句。蘇易簡得其親書。及是與易簡同事。不相能。語人曰。清河更作異。卽以一堆灰之

句進呈矣。洎爲少風。

暮春月內署閣前。海棠花盛開。率爾七言八韻。寄長春諫議。

去歲海棠花發日。曾將詩句詠芳妍。今來花發春依舊。君已雄飛玉案前。驟隔清塵樞要地。獨攀紅藥豔陽天。疎枝高映銀臺月。嫩葉低含綺閣烟。花落花開留勝賞。春來春去感流年。清辭早綴巴人唱。妙翰猶緘蜀國牋。共仰壯圖方赫耳。自嗟衰鬢轉皤然。因馮鶯蝶傳消息。莫忘蓬萊有病仙。

秦南運

南運南唐人官尚書郎

清異錄舒野作青紗連二枕滿貯醱醱木犀瑞香散藥甚益鼻根南運留詩云云

題青紗連二枕

陰香裝豔入青紗還與欵眠好事家夢裏卻成三色雨沈山不敢鬪青華

舒雅

雅字子正歙人南唐時隨計金陵韓熙載知貢舉擢為第一歸宋累遷職方員外郎出守舒州

直昭文館卒

馬令南唐書雅以所學謁韓熙載熙載一見如疇昔館之雅性巧黠應答如流待之為忘年之交出入臥內曾無閒然熙載性懶不拘禮法常與雅易服燕戲揉雜侍婢入未念酸以為笑樂或云熙載所著格言

半雅之辭

紺素雜記韓熙載弊衣履作警者持獨弦琴俾舒

雅執板挽之隨房歌鼓求丐以足日膳且暮亦不禁其出入

答劉學士

往歲別京畿棲山與衆違君心似松柏雁足寄珠璣學道情難篤燒丹力尚微雲中雞犬在祗候主人歸

答錢少卿

蓬萊閣下舊鄰居偶別俄驚四載餘每見寒葭思倚玉忽臨秋水得雙魚人間貴賤誰能及物外優閑我自如聞說歸艎向春渚深知不與道情疎

答內學翰士

清貴無過近侍臣。多情猶憶舊交親。金蓮燭下裁詩句。麟角峯前寄隱淪。和氣忽飄燕谷暖。好風徐起謝庭春。緘藏便是山家寶。留與兒孫世不貧。

王操

操字正美。南唐處士。入宋上南郊頌。授太子洗馬。仕至殿中丞。

歷代吟譜。王操謁宋國老。獻詩。送數百。緘于鍾陵飲酒數日。而盡醉中挂帆數。

百里至落星灣。半醉醒。烟雨中登水心寺。題詩於壁。又咏黃葵詩云云。雅言系述。奉使隴右。至石濠驛作。

村家

野景村家好。柴籬夾樹身。牧童眠向日。山犬吠隨人。地僻鄉音別。年豐酒味醇。風光吟有興。桑麥暖逢春。

送人南歸

相送當搖落。孤舟泛渺瀰。去帆看已遠。臨水立多時。別浦寒鴻下。空山夜鶴移。他年重會面。吟鬢共成絲。

喜故人至

地僻無賓侶。柴門晝始開。谿山寒葉落。江國故人來。舊話驚霜鬢。論詩滯酒杯。相留喜同宿。不寐曙光回。

塞上

無定河邊路。風高雪灑春。沙平寬似海。鵬遠立如人。絕域居中土。多年息虜塵。邊城吹暮角。久客自悲辛。

上李相公

弱冠登龍入粉闈。少年清貴古來稀。袖中詔草朝天去。頭上宮花侍燕歸。卓筆玉堂寒漏迥。卷簾池館水禽飛。三台位近猶多遜。閑聽秋霖憶翠微。

題水心寺壁

分飛南渡春風曉。卻逐家林舊業空。無限離情似楊柳。萬條垂向楚江東。

黃葵

昔年南國看黃葵。雲鬢金釵向後垂。今日衰容籬落上。秋風寂寞兩三枝。

殷崇義

崇義文圭之子。陳州西華人。仕南唐官學士。爲司空知左右史事。歷樞密使右僕射。元宗時淮上用兵。書檄教誥。皆出其手。入宋避宣廟諱。改名湯悅。入史館預修太平御覽等書。十國春秋崇義常撰揚州

孝先寺碑。周世宗征淮南。駐蹕于寺。讀其文嗟歎久之。一統志崇義自少穎悟。嘗見飛星墮水盤中。掬而吞之。文思日麗。

早春寄華下同志

正是花時節。思君寢復興。市沽終不醉。春夢亦無憑。嶽面懸清雨。河心走獨冰。東門一條路。離恨正相仍。鼎臣學士侍郎以東館庭梅昔翰院之毫末。今復半枯。向時同僚零落都盡。素髮垂領。茲唯二人。

感舊傷懷發於吟咏。惠然好我，不能無言。輒次來韻。

憶見萌芽日，還憐合抱時。舊歡如夢想，物態暗還移。素豔今無幾，朱顏亦自衰。樹將人共老，何暇更悲絲。

鼎臣學士侍郎、楚金舍人學士以再傷庭梅詩同垂寵和，清絕感歎，情致俱深，因成四十字陳謝。人物同遷謝，重成念舊悲，連華得瓊玖，合奏發墳箴，餘枿雖無取，殘芳尙獲知。問君何所似，珍重杜林詩。

奉和聖制送鄧王牧宣城

千里陵陽同峽服，鑿門胙土寄親賢。曙烟已別黃金殿，晚照重登白玉筵。江上浮光宜雨後，郡中遠岫列窗前。天心待報期年政，留與工師播管弦。

樂史

史字子正，撫州宜黃人。仕南唐祕書郎，入宋太平興國五年，復登進士，歷水部員外郎，使兩浙巡撫，判西京留司御史臺，卒。有《仙洞集》。

漫叟詩話：世俗人多以樂史慈竹詩諭蒙，謂其有補於教化。有云：又聞猥然死，終不相棄離。事見十四道蕃志。愛州有此獸似猴而大，有仁義

行則大者前，小者後。有爲射所中，則傷者拔死者，箭自刺而死，可以人而不如獸乎。

鍾山寺

千峰夾一徑，一徑花枕泉。聽泉復看花，行到鍾山前。古寺雲生屋，高僧月伴禪。自慙留一宿，匹馬又朝天。

龔穎

頴字同秀。邵武人。初仕南唐為內史。歸宋為殿中侍御史。

青箱雜記。頴自負文學。少許人。談論多所折難。太宗朝知郎州。士罕造其門。獨丁謂贊文求見。

頴倒履延邪。酬對終日。以至忘食。曰。自唐韓柳後。今得子矣。異日丁獻詩於頴。頴次韻和酬。

次韻贈丁謂之

膽怯何由戴鐵冠。祇緣昭代獎孤寒。曲肱未遂違前志。直指無聞是曠官。三署每傳朝客說。五溪閑凭郡樓看。祝君早得文場雋。況值天堦正舞干。

潘慎修

慎修字德成。莆田人。仕南唐為祕書省正字。歸宋為太常博士。真宗朝累擢翰林侍讀學士。有

集。楊文公談苑。太宗棋品第一。待詔有賈元者。臻于絕格。時人以為王積薪之比。元嗜酒病死。楊希榮、蔣元吉、李應昌、朱懷辟皆國手。然非元之敵。晚有李仲元棋絕勝。可侔于元。歲餘亦卒。朝士有蔣居中。潘慎修亦善棋。至三品。內士陳好

元四品。多得侍棋。自元而下皆受三道。慎修受四道。好元受五道。慎修獻詩云。如今縱得仙翁術。也怯君王四路饒。

禁林讌會

紅藥深嚴肅廣筵。嘉招仍許廁羣仙。忽窺宸翰雲龍動。乍揭天辭日月懸。散作楷模珍寶惜。永刊金石共流傳。況當牧馬從容地。仍集班揚侍從賢。敢竊休明為盛觀。願陳風詠播薰弦。不辭勝引承歡醉。長洽昇平億萬年。

陳彭年

彭年字永年。撫州南城人。仕南唐進士。入宋登為祕書丞、直史館、翰林學士。拜參知政事。進兵部侍郎。卒贈右射僕。謚文僖。著唐紀四十卷。江南別錄若干卷。

十國春秋。彭年年十三著皇綱經萬餘言。為名輩所賞。後主聞之。召入宮。令幼

子仲宣與之遊。國老談苑。彭年在翰林所兼十餘職。皆文翰清祕之目。時人謂其署銜為一條冰。湘山野錄。章聖朝申國長公主為尼。詔兩禁送於寺。各賦詩。彭年詩云云。都下好事者。以鷓鴣天曲聲歌之。

送申國長公主為尼

盡出花鈿散寶津。雲鬟初剪向殘春。因驚風燭難留世。遂作池蓮不染身。貝葉乍翻疑軸錦。梵聲纔學誤梁塵。從茲豔質歸空後。湘浦應無解佩人。

刁衍

衍字元賓。昇州人。仕南唐為集賢校理。歸宋授太常寺太祝。真宗朝累遷直祕閣、兵部郎中。有集。

代意

蕙時芳。夕九迴腸。歛袂東窗待曉光。秦嶺樹高迷隴塞。楚天雲淡隔瀟湘。病餘公幹情多詠。秋晚安仁鬢足霜。休道鮫人落珠淚。微波還擬託陳王。

漢武

高宴柏梁詞可仰。橫汾簫鼓樂難窮。已教丞相開東閣。猶使將軍誤奔戎。洒淚甘泉還有恨。祈年仙館惜成空。誰知辛苦回中道。共盡千齡五柞宮。

孫元宴

元宴不知何許人。

詩話。元宴曾著咏史詩。專言江左偏安事。自吳大帝起至陳後主止。附於南唐末。

濡須塢

風揭洪濤響若雷。枕波爲壘險相隈。莫言有箇濡須塢。幾度曹公失志迴。

新亭

容易乘虛逼帝畿。滿江樓櫓與旌旗。盧循若解新亭上。勝負還應未可知。

烏衣巷

古迹荒基好嘆嗟。滿川吟景只烟霞。烏衣巷在何人住。回首令人憶謝家。

黃羅襪

戚屬羣臣盡見猜。預憂身後又堪哀。到頭委付何曾是。虛把羅襪與彥回。

鬱林王

強哀強慘亦從伊。歸到私庭喜可知。喜字漫書三十六。到頭能得幾多時。

李家明

家明廬州西昌人。李璟時為樂部頭。

茗溪漁隱叢話。家明諛諧敏給。善為諷辭。元宗賞花後苑。臨池垂釣。臣下皆得魚。唯元宗獨無所獲。家明進詩云云。元宗大喜。賜宴極歡。嘗見牛晚

臥美蔭。元宗曰。牛具熱矣。家明諛諧曰。曾遭甯戚鞭敲角。又被田單火燎身。閑向斜陽嚼枯草。近來問喘更無人。輔相皆慚。宋齊邱無子。晚年一子輒死。逾月猶哭。齊王景達勸之不止。家明曰。臣能止之。乃作大紙。寫其上云。欲與唐祚革強吳。盡是先生起廟謨。一箇孩兒拚不得。讓皇百口合何如。尹延範族吳氏。齊邱為謀。因以誚焉。乘風放之。故墜齊邱中庭。齊邱見之哭。乃止。後元宗遷南都。已失江北七四郡。舟楫多行南岸。至趙屯。困輟停鴈。北望皖公山。謂家明好青峭數峯。不知何名也。家明應

聲對云云。

釣魚應制

玉甃垂鉤興正濃。碧池春暖水溶溶。凡鮮不敢吞香餌。知是君王合釣龍。

詠皖公山

龍舟輕颺錦帆風。正值宸游望遠空。回首皖公山色翠。影斜不到壽杯中。

王感化

感化建州人。李氏樂人。

談苑。感化少聰敏。未執卷而多識。善為詞。口諧捷急。滑稽無窮。時本鄉節帥更代。餞別。感化獻詩曰。旌旆赴天臺。溪山曉色開。萬家悲更喜。迎佛送如來。至金陵宴苑中。有白野鵲。李璟

令賦詩。應聲云云。又題怪石八句。皆用故事。但記

其一聯云。草巾悞認將軍虎。山上曾為道士羊。

咏白野鵲

碧岩深洞恣遊遨。天與蘆花作羽毛。要識此來棲宿處。上林瓊樹一枝高。

李廷珪

廷珪本姓奚。從易水遷居南唐。賜國姓。

十國春秋。廷珪工造墨。與父超自易水來江南。定居歙州。初姓奚。後賜姓李氏。其弟廷璋。子文用。皆襲其業。然多不及廷珪。江南以澄心堂紙。

龍尾硯。及廷珪墨。為文房三寶。當其時有貴族嘗誤遺廷珪墨一丸於池中。疑為水所壞。因不復取。既逾月。臨池飲。偶墜金器。乃令善泅者下取之。併所得遺墨。光色不變。表裏若新。緣是世多知寶藏云。南唐拾遺記。載韓熙載延歙工朱逢燒墨。命其所曰化松堂。墨曰元中子。又目名麝香月篋而寶之。又輟耕錄。紀南唐墨工李氏外。有耿文政。耿文壽。盛通。盛真。諸人附記於此。墨譜。廷珪有墨訣云云。

墨訣

贈爾烏玉訣。泉清研須潔。避暑懸葛囊。臨風度梅月。

唐希雅

希雅嘉興人。善丹青。與徐熙同時齊名。

橋李詩繫。希雅工金錯書。善丹青。李璟聞其名。欲召之。人謂其嗜酒。無人臣禮。乃止。

題畫

誰潑烟雲六尺綃。寒山秋樹晚蕭蕭。十年來往吳淞口。錯認溪南舊板橋。

全五代詩卷三十七

南唐

陳陶

陶字嵩伯。嶺南人。大中時遊學長安。南唐昇元中。隱洪州西山。後不知所終。詩十卷。

馬世本傳。陳陶世居嶺表。

聲詩歷象。無不精究。昇元中。至南昌。築室西山。日以詩酒爲事。會宋齊邱出鎮南昌。陶志不屈。齊邱亦不爲之薦辟。陶作詩自詠。有中原莫道無麟鳳。自是皇家結網疏之句。陶少與水部員外郎任畹相善。嘗以詩貽之。云。好向明朝薦遺逸。莫教千古弔靈均。後以修煉爲事。有詩云。乾坤見了文章爛。龍虎成來印授疎。又云。任他浮世悲生死。獨駕蒼麟入九霄。又題徐穉亭詩云。伏龍山橫渚洲地。人如白蘋自生死。洪崖道成二千年。唯有徐君播青史。嚴情集。嚴尙書字鎮豫章。以陶操行清潔。欲撓之。遣小妓號蓮花者往侍焉。陶殊不采。妓爲詩求去。有處士不生巫峽夢。虛勞神女下陽臺之句。陶答之云。近來詩思清于水。老大心情薄似雲。已向昇天得門戶。錦衾深愧卓文君。後人移其事爲陳圖南。非也。十國春秋。陳陶二子。小字租梨。陶有詩云。礪溪老叟無人問。閒列租梨教六韜。蓋指二子也。本傳。西山先產藥物數十種。陶采而餌之。開寶中。嘗見一叟角髮被褐。與老媪貨藥于市。獲錢則市鮓對飲。旁若無人。既醉行舞而歌曰。藍采禾。藍采禾。塵世紛紛事更多。爭如賣藥沽酒飲。歸去深崖拍手歌。或疑爲陶夫婦云。張爲主客圖。蟬聲將月短。草色與秋長。又比屋歌黃竹。何人撼白榆。陳陶句也。吟窗雜錄。陶新月句云。好看如鏡夜。莫笑似弓時。又近來世上無徐庶。誰向桑麻識臥龍。皆可想見其爲人。北夢瑣言。洪州處士陳陶有逸才。其詩句云。江湖水深淺。不足掉鯨尾。又云。飲水狼子瘦。思日鷓鴣寒。又云。一鼎雌雄金液火。十年寒暑鹿麕衣。寄與東流任班鬢。向隅終守鐵梭飛。如此例不可殫述。

懷仙吟二首

洞春詩話南唐人多工律句惟嵩伯古詩如懷仙吟等篇皆不減盛唐

丹陵五牙客。昨日羅浮歸。赤斧尋不得。烟霞空滿衣。試於華陽問。果遇三茅知。採藥向十洲。同行牧羊兒。十洲隔八海。浩渺不可期。空留雙白鶴。巢在長松枝。雲溪古流水。春晚桃花香。憶與我師別。片帆歸滄浪。滄浪在何許。相思淚如雨。黃鶴不復來。雲深別離處。石渠泉泠泠。三見菖蒲生。日夜勞夢魂。隨波注東溟。空懷別時惠。長讀消魔經。

遊子吟

棲鳥喜林曙。驚蓬傷歲闌。關河三尺雪。何處是天山。朔風無重衣。僕馬飢且寒。慘慊別妻子。遲迴出門難。男兒值休明。豈是長泥蟠。何者爲木偶。何人侍金鑾。鬱悒守貧賤。悠悠亦無端。進不圖功名。退不處巖巒。窮通在何日。光景如跳丸。富貴若不早。令人摧心肝。誓期春之陽。一振摩霄翰。

悲哉行

中嶽仇先生。遺余餌松方。服之一千日。肢體生異香。步履如風旋。天涯不齎糧。仍云爲地仙。不得朝虛皇。狡兔有三穴。人生又何常。悲哉二廉士。餓死於首陽。

避世翁

海上一簑笠。終年垂釣絲。滄洲有深意。冠蓋何由知。直鉤不營魚。蝸室無妻兒。渴飲寒泉水。飢食紫靈芝。

鶴髮披兩肩。高懷如澄陂。嘗聞仙老言。云是古鷗夷。石竇閟雷雨。金潭養蛟螭。乘槎上玉津。騎鹿遊峨眉。以人爲語默。與世爲雌雄。茲焉乃磻溪。豹變應須時。自古隱淪客。無非王者師。

草木言

何生我蒼蒼。何育我黃黃。草木無知識。幸君同三光。始自受姓名。葳蕤立表裳。山河旣分麗。齊首乳青陽。甘辛各有榮。好醜不相防。常憂刀斧劫。竊慕仁壽鄉。願天雨無暴。願地風無狂。雨足因衰憊。風多因天傷。在山不爲桂。徒辱君高岡。在水不爲蓮。徒占君深塘。勿輕培塿阜。或有奇棟梁。勿輕蒙矐澤。或有奇馨香。涓毫可蘆差。朝菌壽爲長。擁腫若無取。大椿命爲傷。婆娑不材生。苒苒向秋荒。幸遭薰風日。有得皆簸揚。所愧雨露恩。願效幽微芳。希君頻採擇。勿使枯雪霜。

塗山懷古

落拓書劍晚。清秋鷹正籠。塗山間來上。愛敬如登龍。覽古覺神王。翛然天地空。東南更何有。一醉先王風。惟昔放勳世。陰晦徹成洪。皇圖化魚鱉。天道漂無蹤。帝乃命舟楫。撥方儒素中。高陳九州力。百道驅歸東。舊物復光明。洪爐再挺鎔。經門不私子。足知天下公。亮曰那並生。唐虞禪華蟲。華山朝萬國。一賦寰海同。十載有區寓。秋毫亦帝功。垂衣不驕德。子桀如何聾。握髮聞禮賢。葺苑見卑宮。凡夫色難事。神聖安能恭。道隱三千年。遺芳播笙鏞。當時執圭處。佳氣仍童童。海嶼儼清廟。天人盛祇供。元恩及花木。丹讖名崆峒。異代草澤臣。何由樹勳庸。堯階未曾識。誰信平生忠。恨不當際會。預爲執鞭僮。勞歌山下去。懷德心無窮。

早發始興

雲裏山已曙。舟中火初爇。綠浦待行橈。元猿催落月。沿流信多美。況復秋風發。挂席借前期。晨雞莫嘲啜。番禺道中作

博羅程遠近。海塞愁先入。瘴雨出虹蜺。蠻江渡山急。常聞島夷俗。犀象滿城邑。雁至草猶春。潮迴檣半溼。丹邱鳳凰隱。水廟蛟龍集。何處樹能言。幾鄉珠是泣。千年趙佗國。霸氣委原隰。齷齪笑終軍。長纓禍先及。

宿烏徑夷山舍

百里遵烏徑。逢征信邈迴。暝依漁樵宿。似過黃金臺。缺齧心未理。寥寥夜猿哀。山深石牀冷。海近腥氣來。主人意不淺。屢獻流霞杯。對月撫長劍。愁襟紛莫開。九衢平如水。胡爲涉崔嵬。一飯未遑飽。鵬圖信悠哉。山濤謔細君。吾豈厭蓬萊。明發又驅馬。客思一徘徊。

蒲門戍觀海作

廓落溟漲曉。蒲門鬱蒼蒼。登樓禮東君。旭日生扶桑。毫釐見蓬瀛。含吐金銀光。草木露未晞。蜃樓氣若藏。欲遊蟠桃國。慮涉魍魎鄉。徐市惑秦朝。何人在巖廊。惜哉千童子。葬骨於渺茫。恭聞槎客言。東池接天潢。卽此聘牛女。曰祈長壽方。靈津水清淺。余亦慕修航。

海昌望月

何處無今夕。豈期在海頭。賈客不愛月。蟬娟入滄洲。浩然傷歲華。獨望湖邊樓。煙島青歷歷。藍田白悠悠。

誰無破鏡期。繫我信虛舟。誰無桂枝念。繫我方摧輶。始見彎環春。又逢團圓秋。莫厭綾扇夕。百年多銀鈎。金盤誰雕鐫。玉窟難寫搜。重輪運時節。三五不自由。疑拋雲上鍋。欲摟天邊毬。嬌居應寒冷。擣藥青冥愁。兔子樹下蹲。蝦蟆池上游。如何名金波。不共水東流。天花辟膻腥。野雲無邊陲。蚌蛤乘大運。含珠相對酬。夜鵲思南鄉。露華清東甌。百寶安可覩。老龍鑱深湫。究究如情人。盜者卽仇讐。海涯上皎潔。九門更清幽。亭亭勸金樽。夜久喘吳牛。夷俗皆輕擲。北山思今遊。雁聲故鄉來。客淚墮南州。平生煙霞志。讀書覓封侯。四海尙白身。豈無故鄉羞。塲坎何足歎。壯如水中虬。獵獵谷底蘭。搖搖波上鷗。中途喪資斧。兩地生繁憂。一杯太陰君。鷓鷯豈無求。明日將片葉。三山東南浮。

和西江李助副使早登開元寺閣

虛豁登寶閣。三休極層構。獨立天地間。煙雲滿襟袖。鼇荒初落日。劍野呈綺繡。秋檻祝融微。陰軒九江湊。拂簷黃姑舍。錯落白榆秀。倚砌天竺祠。蛟龍蟠古甃。脩然觀六合。一指齊宇宙。書劍忽若□。青雲日方晝。南朝空蒼莽。楚澤稀耕耨。萬事溺頽波。一航安可受。徒云寄麟泣。六五終難就。資斧念餘生。湖光隱圭竇。早聞羣黃鶴。飄舉此江岫。陵谷空藹然。人樵已雛鷺。燕宮豸冠客。憑覽發清奏。珠玉難嗣音。攬轅愧孤陋。

贈江西周大夫

否極生大賢。九元降靈氣。獨立正始風。蔚然中興瑞。淵淪照三古。磊落涵涇渭。真貌月懸秋。雄詞雷出地。具瞻先皇寵。欲踐東華貴。咫尺時不來。千秋鼎湖淚。因分三輔職。進領南平位。報政黃霸慙。提兵呂蒙醉。

歲星臨斗牛。水國嘉祥至。不獨蒼生蘇。仍兼六騶喜。恭聞廟堂略。欲斷匈奴臂。剗釋自宸衷。平戎在連帥。時廢簪笏冗。世梗忠良議。邱壑非無人。松香有私志。三朝倚天劍。十萬浮雲騎。可使河曲清。羣公信兒戲。滄溟用謙德。百谷走童稚。禦衆付深人。參籌須偉器。他年蓬華賤。願附鴛鴦翅。

將歸鍾陵留贈南海李尚書

楚國有田舍。炎州長夢歸。懷恩似秋燕。屢遶玉堂飛。越酒豈不甘。海魚寧無肥。野裘醉歌舞。事與初心違。粵粵文昌公。英靈世間稀。長江浩無際。龍蜃皆歸依。賤子感一言。草茅發光輝。從來雞鳧質。得假鳳凰威。常欲討元珠。青雲報巍巍。龍門竟多故。雙淚別旂旒。

旅次銅山途中先寄温州韓使君

亂山滄海曲。中有橫陽道。束馬過銅梁。茗華坐堪老。鳩鳴高崖裂。熊鬪深樹倒。絕壑無坤維。重林失蒼昊。躋攀寡儔侶。扶接念輿阜。俛仰慄嵌空。無因掇靈草。梯窮聞戍鼓。魂續賴邱禱。敞豁天地歸。縈紆村落好。悠悠思蔣徑。擾擾愧商皓。驅想永嘉侯。應傷此懷抱。

寄元孚道人

梵宇章句客。佩蘭三十年。長乘碧雲馬。時策翰林鞭。曩事五岳遊。金衣曳祥煙。高攀桐君手。左倚鸞鷲肩。哭玉秋雨中。摘星春風前。橫騎截洪偃。憑几見廣宣。爾來寤華胥。石壁孤雲眠。龍降始得偈。龜老方巢蓮。內殿無文僧。騶虞誰能牽。因之問楚水。弔屈幾潺湲。

種蘭

種蘭幽谷底。四遠聞馨香。春風長養深。枝葉趁人長。智水潤其根。仁鋤護其芳。蒿藜不生地。惡鳥弓已藏。椒桂夾四隅。茅茨居中央。左鄰桃花塢。右接蓮子塘。一月薰手足。兩月薰衣裳。三月薰肌骨。四月薰心腸。幽人飢如何。採蘭充餼糧。幽人渴如何。醞蘭爲酒漿。地無青苗租。白日如羲皇。不嘗仙人藥。端坐紅霞房。日夕望美人。佩花正煌煌。美人久不來。佩花徒年光。刈穫及葳蕤。無令見雪霜。清芬信神鬼。一葉豈可忘。舉頭愧青天。鼓腹詠時康。下有賢公卿。上有聖明王。無階答風雨。願獻蘭一筐。

題僧院紫竹

喜遊蛟井寺。復見炎州竹。杳靄萬丈間。嘯風清獨速。江南正霜霰。吐秀弄顛頊。似瑞驚堅貞。如魔試金粟。筍非孝子泣。文異湘靈哭。金碧誰與鄰。蕭森自成族。新聞赤帝種。子落毛人谷。遠祖賜鷦鷯。遺芳遍南陸。對煙蘇麻醜。夾澗篔簹伏。美譽動丹青。瓊姿豔秦蜀。因緣鹿識苑。想像蛇邱斲。幾葉別黃茅。何年依白足。龍樹蟄一花。砌瑤掃雲屋。色靜曼仙花。名高給孤燭。青蔥太子樹。灑落觀音目。法雨每沾濡。玉毫時照燭。離居鸞節變。樹冷金顏縮。豈念葛陂榮。幸無祖父辱。光搖水精串。影送蓮花軸。江鷺日相尋。野鷄時寄宿。幽香入茶灶。靜翠入棋局。肯羨垣上蒿。自多籬下菊。從來道生一。況伴龜藏六。棲託巨星迴。檀欒已雲矗。霞杯傳縹葉。羽管吹紫玉。久絕釣竿歌。聊栽竹枝曲。愧生黃金地。千秋爲師綠。

飛龍引

長洲茂苑朝夕池。映日含風結細漪。坐堂伏檻紅蓮披。雕軒洞戶青蘋吹。輕幌芳烟鬱金馥。綺簷花簾桃李枝。蘭茗翡翠但相逐。桂樹鴛鴦恆並宿。

將進酒

金樽莫倚青春健。齷齪浮生如走電。琴瑟盤傾從世珠。黃泥局瀉流年箭。麻姑爪頽瞳子昏。東皇肉角生魚鱗。靈鼈柱骨半枯朽。驪龍德悔愁耕人。周孔著龜久淪沒。黃蒿誰認賢愚骨。兔苑詞才去不還。蘭亭水石空明月。巫娥弄簫香雨收。江濱迸瑟魚龍愁。靈芝九折楚蓮醉。鸚風一歎梁庭秋。醵凸蠻觥奉君壽。玉山三獻春紅透。銀鴨金鵝言待誰。隋家嶽瀆皇家有。珊瑚座上凌杳雲。鳳臙龍炙猩猩脣。芝蘭此日不傾倒。南山白日皆賢人。文康調笑麒麟起。一曲飛龍壽天地。

巫山高

玉峰青靈十二枝。金母和雲賜瑤姬。花宮磊砢楚宮外。列仙八面星斗垂。秀色無雙怨三峽。春風幾夢襄王獵。青鸞不在嬾吹簫。斑竹題詩寄江妾。飄颻散絲巴子天。苔裳玉轡紅霞幡。歸時白帝掩青瑣。瓊枝草草迷湘烟。

雞鳴曲

雞聲春曉上林中。一聲驚落蝦蟆宮。一聲喚破枕邊夢。三聲行人煙海紅。平旦慵將百雜語。蓬鬆錦繡當陽處。愧君飲食長相呼。爲君晝鳴下高樹。

關山月

昔年嫖姚護羌月。今見嫖姚雙鬢雪。青塚曾無尺寸歸。錦書多寄窮荒骨。百戰金瘡體沙磧。鄉心一片懸秋碧。漢帝應題破鏡時。胡塵萬里嬋娟隔。度磧衝雲朔風起。邊笳欲曉生青珥。隴上橫吹雪色刀。何年斷得匈奴臂。

空城雀

古城濛濛花覆水。昔日住人今住鬼。野雀荒臺遺子孫。千年飲啄枯桑根。不隨海燕柏梁去。應無玉環銜報恩。近村紅粟香壓枝。嗷嗷黃口訴朝飢。生來未見鳳凰語。欲飛常怕蜘蛛絲。斷腸四隅天四絕。清泉綠蒿無恐疑。

獨搖手

漢宮新鸞矜娥眉。春臺豔妝蓮一枝。迎春侍宴瑤華池。游龍千盤嬌欲飛。冶袖鶯鸞拂朝曦。摩煙裊雪金碧遺。愁鴻連翮蠶曳絲。颯逖明珠掌上移。仙人龍鳳雲雨吹。朝哀暮愁引啞咿。鴛鴦翡翠承宴私。南山一笑君無辭。仙娥泣月清露垂。六官燒燭愁風欹。

小笛弄

一尺玲瓏握中翠。仙娥月浦呼龍子。五夜流珠粲夢卿。九清鸞倚洪崖醉。丹穴飢兒笑風雨。媧皇碧玉星星語。蛇蝎愁聞骨髓寒。江山恨老眠秋霧。綺席鴛鴦冷珠翠。星流露泣誰驅使。江南一曲罷伶倫。芙蓉水

殿春風起。

謫仙詞

牧龍丈人病高秋。羣童擊節星漢愁。瑤堂鳳輦不勝恨。太古一聲龍白頭。玉氣蘭光久摧折。上清雞犬音書絕。蜺旌失手遠於天。三島空雲對秋月。人間磊磊浮漚客。鸞鷲蜻蜓飛自隔。不應冠蓋逐黃埃。長夢真君舊恩澤。

古鏡篇

紫皇玉鏡蟾蜍字。墮地千年光不死。發匣深沉古井寒。懸臺日照愁成水。海戶山窗幾梳綰。菱花開落何人見。野老曾耕太白星。神狐夜哭秋天片。下國青銅旋磨滅。迴變萬影成枯骨。會待搏風雨沆寥。長恐莓苔蝕明月。

冬夜吟

黑帝天寒愁散玉。東皇海上張仙燭。侯家歌舞案梨園。石氏賓寮醉金谷。魯家襜褕闔披水。雪花燈下甘垂翅。散帙高編折桂枝。披沙密翫青雲地。霜白溪松轉斜蓋。銅龍喚曙咽聲細。八埏螻蟻厭寒棲。早晚青旂引春帝。展轉城烏啼紫天。瞳矇千騎衙樓前。

錢塘對酒曲

風天雁悲西陵愁。使君紅旗弄濤頭。東海神魚騎未得。江天大笑間悠悠。嵯峨吳山莫誇碧。河陽經年一

宵白。南州彩鳳爲君生。古獄愁蛇待恩澤。三清羽童來何遲。十二玉樓蝴蝶飛。炎荒翡翠九門去。遼東白鶴無歸期。鷓夷公子休悲悄。六鷺如鏡天始老。樽前事去月團圓。琥珀無情憶蘇小。

殿前生桂樹

仙娥玉宮秋夜明。桂枝拂檻參差瓊。香風下天漏丁丁。牛渚翠梁橫淺清。羽帳不眠恨吹笙。棲鳥暗驚仙子落。步月鬢雲墮金雀。蕙樓涼簟翠波空。銀縷香寒鳳凰薄。東海卽爲郎斟酌。綺疏長懸七星杓。

西川座上聽金五雲唱歌

蜀王殿上華筵開。五雲歌從天上來。滿堂羅綺悄無語。喉音止駐雲徘徊。管絃金石還依轉。不隨歌出靈和殿。白雲飄飄席上來。貫珠歷歷聲中見。舊樣釵篸淺澹衣。元和梳洗青黛眉。低叢小鬢膩鬢鬢。碧牙鏤掌山參差。曲終暫起更衣過。還向南行座頭坐。低眉欲語謝貴侯。檀臉雙雙淚穿破。自言本是宮中嬪。武皇改號承新恩。中丞御史不足比。水殿一聲愁殺人。武皇鑄鼎登真籙。嬪御蒙恩免幽辱。茂陵弓劍不得親。嫁與卑官到西蜀。卑官到官年未周。堂衡祿罷東西遊。蜀江水急駐不得。復此萍蓬二十秋。今朝得侍王侯宴。不覺途中妾身賤。願持卮酒更唱歌。歌是伊州第三遍。唱着右丞征戍詞。更聞閨月添相思。如今聲韻尙如此。何況宮中年少時。五雲處處可憐許。明朝道向褒中去。須臾宴罷各東西。雨散雲飛莫知處。

贈別離

碧玉飛天星墜地。玉劍分風交合水。楊柳聽歌莫向隅。雞鳴一石留髡醉。蹄輪送客溝水東。月娥揮手崦

岷峰巒天列嶂儼相待。風官掃道迎游龍。天姥剪霞鋪曉空。灑灑大帝開明宮。文鯨掉尾四海通。分明瀑布收靈桐。山妖水魅騎旋風。魘夢齧魂黃瘴中。借君朗鑒入崆峒。靈光草詔閒花紅。

塞下曲二首

邊頭能走馬。猿臂李將軍。射虎羣胡伏。開弓絕塞聞。海山諳向背。攻守別風雲。只爲坑降罪。輕車未轉勳。望湖關下戰。雜虜喪全師。鳥啄豺狼將。沙埋日月旗。牛羊奔赤狄。部落散燕耆。都護凌晨出。銘功瘞死屍。

池塘生春草

謝公遺詠處。池水夾通津。古往人何在。年來草自春。色宜波際綠。香異雨中新。今日青青意。空悲行路人。

自歸山

海嶽南歸遠。天門北望深。暫爲青瑣客。難換白雲心。富貴老閒事。猿猱思舊林。清平無樂志。樽酒有瑤琴。

濟浙江

適越一輕艘。凌競截鷺濤。曙光金海近。晴雪玉峰高。靜寇思投筆。傷時欲釣鼈。壯心殊未展。登涉漫勞勞。

清源途中旅思

古來閩州道。驅羸落照閒。投村礙野水。問店隔荒山。身事幾時了。蓬飄何日間。看花滯南國。鄉月十灣環。

南海石門戍懷古

漢家征百越。落地喪貔貅。大野朱旗沒。長江赤血流。鬼神尋覆族。宮廟變邱荒。唯有朝臺月。千年照戍樓。

題上人法華新院

浮名深般若。方等設蓮華。鐘唄成僧國。湖山稱法家。一塵多寶塔。千佛大牛車。能誘泥犁客。超然識聚沙。南海送韋七使君赴象州任

一鶚韋公子。新恩領郡符。島夷通荔浦。龍節過蒼梧。地理金城近。天涯玉樹孤。聖朝朱紱貴。從此展雄圖。

送沈次魯南遊

高臺贈君別。滿握軒轅風。落日一揮手。金鵝雲雨空。鼇洲石梁外。劍浦羅浮東。茲興不可接。脩脩煙際鴻。

送秦鍊師

紫府靜沈沈。松軒思別吟。水流寧有意。雲泛本無心。錦洞桃花遠。青山竹葉深。不因時賣藥。何路更相尋。

湓城贈別

楚岸青楓樹。長隨送遠心。九江春水闊。三峽暮雲深。氣調桓伊笛。才華蔡琰琴。迢迢嫁湘漢。誰不重黃金。

贈別

海國一尺綺。冰壺萬縷絲。以君西攀桂。贈此金蓮枝。高鳥思茂樹。窮魚樂洿池。平生握中寶。無使歲寒移。

哭寶月三藏大禪師

五峰習聖罷。乾竹化身歸。帝子傳真印。門人哭寶衣。一囊窮海沒。三藏故園稀。無復天花落。悲風滿鐵圍。

聖帝擊壤歌四十聲

百六承堯緒。艱難土運昌。大虛橫彗孛。中野鬪豺狼。帝曰更吾嗣。時哉憶聖唐。英皇垂將校。神嶽誕忠良。鍊石醫元氣。屠鼈正昊蒼。掃原鋪一德。驅禊立三光。大道重蘇恩。真風再發揚。芟夷踰舊跡。神聖掩前王。郊酒酣寥廓。鴻恩受渺茫。地圖龜負出。天誥鳳銜將。雜貢來山峙。羣夷入雁行。紫泥搜海岱。鴻筆富巖廊。鷹象敷宸極。寰瀛作瑞坊。泥丸封八表。金鏡照中央。構殿祈麟趾。開藩表鳳翔。鑾輿親稼穡。朱幌務蠶桑。戎羯輸天馬。靈仙侍玉房。宮儀水蒐甲。門衛綠沈槍。陶鑄超三古。車書混萬方。時巡望虞舜。蒐獸法殷湯。化合謳謠滿。年豐鬼蜮藏。政源歸牧馬。公法付神羊。寶鼎無靈應。金甌肯破傷。封山昭茂績。祠執答嘉祥。在昔宮闈僭。仍罹羿浞殃。牝雞何譏譎。獬犬漫劾勤。苗禱三靈怒。桓偷九族亡。鯨鯢尋掛網。魍魎旋投荒。松柏霜逾翠。芝蘭露更香。聖謨流作遠。仙系發源長。島嶼征徭傳。漪瀾汎稻梁。鳧魚饜滄啖。荷蓐足衣裳。寤寐華胥國。嬉遊太素鄉。鷹鷗飛接翼。忠孝住連牆。有叟能調鼎。無媒隱釣璜。乾坤資識量。江海入文章。野鶴思蓬闕。山麋憶廟堂。泥沙空淬礪。星斗屢低昂。歷草何因見。衢尊豈暫忘。終隨嘉橘賦。霄漢謁羲皇。

全五代詩卷三十八

南唐

陳陶二

和容南韋中丞題瑞亭白燕白鼠六眸龜嘉蓮四韻

伏波恩信動南夷。交趾喧傳四瑞詩。鸞鼠孕靈褒上德。龜蓮增耀答無私。迴翔雪侶窺簷處。照映紅巢出水時。盡寫風流在軒檻。嘉祥從此百年知。

鍾陵道中作

原隰經霜蕙草黃。塞鴻消息怨流芳。秋山落照見麋鹿。南國異花開雪霜。煙火近通槃瓠俗。水雲深入武陵鄉。曾逢齧缺話東海。長憶蕭家青玉床。

旅泊塗江

煙雨南江一葉微。松潭漁火夜相依。斷沙雁起金精出。孤嶺猿愁木客歸。楚國柑橙勞夢想。丹陵霞鶴間音徽。無因得似滄溟叟。始憶離巢已倦飛。

劍池

秦帝南巡厭火精。蒼黃埋劍故豐城。霸圖繚戾金龍蟄。坤道扶搖紫氣生。星斗臥來閒窟穴。雌雄飛去變

澄泓永懷惆悵中宵作。不見春雷發匣聲。

登寶歷寺閣

金碧高層世界空。凭蜺長嘯八蠻風。橫軒水壯蛟龍府。倚棟星開牛斗宮。三楚故墟殘燒北。六朝荒苑斷山東。不堪懷古勞悲笑。安得鵬搏顛氣中。

題豫章西山香城寺

十地巖宮禮竺皇。栴檀樓閣半天香。祇園樹老梵聲小。雪嶺花香燈影長。霄漢落泉供月界。蓬壺靈鳥侍雲房。何年七七空人降。金錫珠壇滿上方。

賀容府常中丞天府賢凡新除黔南經略

蓬瀛簪笏舊聯行。紫極差池降寵章。列國山河分雁字。一門金玉盡龍驤。耿家符節朝中美。袁氏芝蘭闕外香。烽戍悠悠限巴越。佇聽歌詠兩甘棠。

贈容南韋中丞

普寧都護軍威重。九譯梯航壓要津。十二銅魚尊畫戟。三千犀甲擁朱輪。風雲已靜西山寇。閭井全移上國春。不獨來蘇發歌詠。天涯半是泣珠人。

投贈福建路羅中丞

越豔新謠不厭聽。樓船高臥靜南溟。未聞建水窺龍劍。應喜家山接女星。三捷楷模光曲策。一生封爵笑

丹青皇恩幾日西歸去。玉樹扶疎正滿庭。

贈江南李偕副使

世祿三朝壓鳳池。杜陵公子漢庭知。雷封始賀棠溪劍。花府尋邀玉樹枝。幾日坐談誅叛逆。列城歸美見歌詩。從來莫厭千場醉。卽是金鑾寵命時。

贈温州韓使君

康樂風流五百年。永嘉鈴閣又登賢。嚴城鼓動魚驚海。華屋樽開月下天。內史筆鋒光案牘。鄢陵詩句滿山川。今來誰似韓家貴。越絕麾幢雁影連。

贈漳州張怡使

舊德徐方天下聞。當年熊軾繼清芬。井田異政光蠻竹。符節深恩隔瘴雲。已見嘉祥生北戶。嘗嫌夷貊蠱南薰。幾時徵拜征西越。學着縵胡從使君。

贈江南從事張侍御

平南門館鳳凰毛。二十華軒立最高。幾處談天致雲雨。早時文海得鯨鯨。姻聯紫府蕭臆貴。職稱青錢繡服豪。江徼無虞才不展。銜杯終日詠離騷。

謫仙吟贈趙道士

汗漫東遊黃鶴雛。縉雲仙子住清都。三元麟鳳推高座。六甲風雷闕小壺。日月暗資靈壽藥。小河擬作化

生符若爲失意蓬居鳥。鼈足塵飛桑樹枯。

賀自真登仙

雲笈七籤云。自真爲道士。居嵩山。焚修精勤。人不知其甲子。一日雲鶴滿空。聲樂清亮。飛昇而去。陶在東都。見人瞻禮。作詩曰。

子晉鸞飛古洛川。金桃再熟賀郎仙。三清樂奏嵩邱下。五色雲屯御苑前。朱頂舞翻迎絳節。青鬢歌對駐香輶。誰能白晝相悲泣。太極光陰幾萬年。

寄兵部任畹郎中

當思劍浦別清塵。荳蔻花紅十二春。崑玉已成廊廟器。澗松猶是薜蘿身。雖同橘柚依南土。終仰魁罡近北辰。好向昌時薦遺逸。莫教千古弔靈均。

閒居寄太學盧璟博士

無路青宴奪錦袍。恥隨黃雀住蓬蒿。碧雲夢後山風起。珠樹詩成海月高。久滯鼎書求羽翼。未忘龍闕致波濤。閒來長得留侯癖。羅列欂梨校六韜。

送江西周尙書赴滑臺

楚謠襦袴整三千。喉舌新恩下九天。天角雄都分節越。蛟龍舊國罷樓船。崑河已在兵鈴內。棠樹空留鶴嶺前。多病無因酬一顧。鄢陵千騎去翩翩。

閩中送任畹端公還京

燕臺下榻玉爲人。月桂曾輸次第春。幾日酬恩坐炎瘴。九秋高架拂星辰。漢庭鳳進鵷行喜。隋國珠還水府貧。多少嘉謀奏風俗。斗牛孤劍在平津。

經徐稚墓

邴鄒妖興炎漢衰。先生南國臥明夷。鳳凰屢降元纁禮。瓊石終藏烈火時。禁掖衣冠加宋鵠。湖山耕釣沒堯師。千年龍樹何人哭。寂寞蒼苔內史碑。

上建溪

崆峒一派瀉蒼煙。長揖丹邱逐水仙。雲樹杳冥通上界。峰巒迴合下閩川。侵星愁過蛟龍國。採碧時逢婺女船。已判猿催鬢先白。幾重灘瀨在秋天。

冬暮旅泊廬陵

螺亭倚棹哭飄蓬。白浪欺船自向東。楚國蕙蘭曾悵望。番禺筐篚屢虛空。江城雪落千家夢。汀渚冰生一夕風。棄置侯鯖任羈束。不勞龜瓦問窮通。

豫章江樓望西山有懷

水護星壇列太虛。煙霓十八上仙居。時人未識遼東鶴。吾祖曾傳寶鼎書。終日章江催白鬢。何年丹竈見紅蕖。桃花谷口春深淺。欲訪先生赤鯉魚。

續古二十八首

吳洲采芳客。桂棹木蘭船。日晚欲有待。徘徊春風前。
仙家風景晏。浮世年華速。邂逅漢武時。蟠桃東海熟。
南國珊瑚樹。好裁天馬鞭。魚龍不解語。海曲空嬋娟。
周穆恣遊幸。橫天驅八龍。寧知泰山下。日日望登封。
秦國饒羅網。中原絕麟鳳。萬乘巡海回。鮑魚空相送。
秦家無廟略。遮虜續長城。萬姓隴頭死。中原荆棘生。
秦作東海橋。中州鬼辛苦。縱得跨蓬萊。羣仙亦飛去。
隋煬棄中國。龍舟巡海涯。春風廣陵死。不見秦宮花。
范子相勾踐。滅吳成大勳。雖然五湖去。終愧磻谿雲。
麟鳳識翔蟄。聖賢明卷舒。哀哉嵇叔夜。智不及鷄鵠。
戰地三尺骨。將軍一身貴。自古苦弔冤。落花少于淚。
楚國千里旱。土龍日已多。九穀竟枯死。好雲閒嵯峨。
漢家三殿色。恩澤若飄風。今日黃金屋。明朝長信宮。
南園杏花發。北渚梅花落。美女妬西施。容華日銷鑠。
山雞理毛羽。自古勝烏鳶。一朝逢鸞鷲。羞死南海邊。

秦王卷衣貴。本自倡家子。金殿一承恩。貂蟬滿鄉里。
魏宮薛家女。秀色傾三殿。武帝鼎湖歸。一身似秋扇。
嬋娟越機裏。織得雙棲鳳。慰此殊世花。金梭忽停弄。
學古三十載。猶依白雲居。每覽班超傳。令人慵讀書。
雄劍久濩落。夜吟秋風起。不是嬾爲龍。此非延平水。
朝爲楊柳色。暮作芙蓉好。春風若有情。江山相逐老。
大堯登寶位。麟鳳煥宸居。海曲沾恩澤。還生比目魚。
生值揖遜歷。長歌東南春。釣鯨年三十。未見天子巡。
軒轅承化日。羣鳳戲池臺。大樸衰喪後。仲尼生不來。
大道歸孟門。蕭蘭日爭長。想得巢居時。碧江應無浪。
矻矻蓬舍下。慕君騏驎閣。笑殺王子喬。寥天乘白鶴。
杳杳巫峽雲。悠悠漢江水。愁殺幾少年。春風相憶地。
景龍臨太極。五鳳當庭舞。誰信壁間梭。升天作雲雨。

閩南唐雅。又載一首云。曾夢諸侯笑。康囚議。
脫枷千根池底藕。一朵火中花。似僞作附記。

永嘉贈別

芳草溫陽客。歸心浙水西。
臨風青桂楫。幾日白蘋溪。

長相思

欲唱元雲曲。知音復誰是。
採掇情未來。臨池畫春水。

水調詞十首

黠虜迢迢未肯和。五陵年少重橫戈。
誰家不結空閨恨。玉筯闌干妾最多。
羽管慵調恐別離。西園新月伴愁眉。
容華不分隨君去。獨有粧樓明鏡知。
憶錢良人玉塞行。梨花三見換啼鶯。
邊場豈得勝閨閣。莫逞瑯弓過一生。
惆悵江南早雁飛。年年辛苦寄寒衣。
征人豈不思鄉國。只是皇恩未放歸。
水閣蓮開燕引雛。朝朝攀折望金吾。
聞道磧西春不到。花時還憶故園無。
自從清野成遼東。舞袖香銷羅幌空。
幾度長安發梅柳。節旄零落不成功。
長夜孤眠倦錦衾。秦樓霜月若邊心。
征人一倍裝綿厚。猶慮交河雪凍深。
瀚海長征古別離。華山歸馬是何時。
仍聞萬乘尊猶屈。裝束千嬌嫁郅支。
沙塞依稀落日邊。寒宵魂夢怯山川。
離居漸覺笙歌懶。君逐嫖姚已十年。
萬里輪臺音信稀。傳聞移帳護金微。
會須麟閣留蹤跡。不斬天驕莫議歸。

隴西行四首

漢主東封報太平。無人金闕議邊兵。縱饒奪得林胡塞。磧地桑麻種不生。
誓掃匈奴不顧身。五千貂錦喪胡塵。可憐無定河邊骨。猶是春閨夢裏人。
隴戍三看塞草青。樓煩新替護羌兵。同來死者傷難別。一夜孤魂哭舊營。
黠虜生擒未有涯。黑山營陣識龍蛇。自從貴主和親後。一半胡風似漢家。

子規思

春山杜鵑來幾日。夜啼南家復北家。野人聽此生惆悵。恐畏踏落東園花。

古意

麻姑井邊一株杏。花開不如古時紅。西鄰蔡家十歲女。年年二月嗔東風。

閒居雜興五首

虞韶九奏音猶在。只是巴童自棄遺。閒臥清秋憶師曠。好風搖動古松枝。
一顧成周力有餘。白雲閒釣五谿魚。中原莫道無麟鳳。自是皇家結網疎。
長愛真人王子喬。五松山月伴吹簫。從他浮世悲生死。獨駕蒼麟入九霄。
越里娃童錦作襦。豔歌聲壓郢中姝。無人說向張京兆。一曲江南十斛珠。
雲堆西望賊連營。分闌何當舉義兵。莫道羔裘無壯節。古來成事盡書生。

夏日懷天臺

竹齋睡餘柘漿清。麟鳳誇我勞此生。忽憶天臺掩書坐。澗雲起盡紅崢嶸。

鍾陵秋夜

洪崖嶺上秋月明。野客枕底章江清。蓬壺宮闕不可夢。一一入樓歸雁聲。

吳興秋思二首

不是苕溪厭看月。天涯有程雲樹涼。何意汀州剩風雨。白蘋今日似瀟湘。
日夕鯤魚夢南國。苕陽水高迷渡頭。故山秋風憶歸去。白雲又被王孫留。

古蓮塘

闔闔宮娃能采蓮。明珠作佩龍爲船。三千巧笑不復見。江頭廢苑花年年。

投贈福建桂常侍二首

後來臺席更何人。都護朝天拜近臣。長笑當時漢卿士。等閒恩澤畫麒麟。
匝地歌鐘鎮海隅。城池鞅掌舊名都。不知珠履三千外。更許侯嬴寄食無。

酬元孚上人

一衲淨居雲夢合。秋來詩思祝融高。何因知我津涯闊。遠寄東溟六巨鰲。

答蓮花妓

近來詩思清於水。老大心情薄似雲。已向昇天得門戶。錦衾深愧卓文君。

鏡道人吹簫

金欄白的苦參差。雙鳳夜伴江南棲。十洲人聽玉樓曉。空向千山桃杏枝。

竹十一首

不厭東谿綠玉君。天壇雙鳳有時聞。一峰曉似朝仙處。青節森森倚絳雲。
萬枝朝露學瀟湘。杳靄孤亭白石涼。誰道乖龍不行雨。春雷入地馬鞭狂。
須題內史琅玕塢。幾醉山陽琴瑟村。剩養萬莖將掃俗。莫教凡鳥鬧雲門。
一谿雲母間靈花。似到封侯逸士家。誰識雌雄九成律。子喬丹井在深涯。
嘯入新篁一里行。萬竿如鑿鎖龍泓。驚巢翡翠無尋處。閒倚雲根刻姓名。
燕燕雛時紫米香。野溪羞色過東牆。諸兒莫拗成蹊筍。從結高籠養鳳凰。
青嵐箒亞思吾祖。綠潤偏多憶蔡邕。長聽南園風雨夜。恐生鱗甲盡爲龍。
迸玉閒抽上釣磯。翠苗番次脫霞衣。山童泥乞青驄馬。騎過春泉掣手飛。
一節呼龍萬里秋。數莖垂海六鰲愁。更須瀑布峯前種。雲裏闌干過子猷。
邱壑誰堪話碧鮮。靜尋春譜認嬋娟。會當小殺青瑤簡。圖寫龜魚把上天。
元圃千春閉玉叢。淇陽一祖碧雲空。不須騷屑愁江島。今日南枝在國風。

蜀葵詠

綠衣宛地紅倡倡。薰風似舞謀女郎。南隣蕩子婦無賴。錦機春夜成文章。

泉州刺桐花詠六首兼呈趙使君

海曲春深滿郡霞。越人多種刺桐花。可憐虎竹西樓色。錦帳三千阿母家。
石氏金園無此豔。南都舊賦乏靈材。只因赤帝宮中樹。丹鳳新銜出世來。
猗猗小豔夾通衢。晴日薰風笑越姝。只是紅芳移不得。刺桐屏障滿中都。
不勝攀折悵年華。紅樹南看見海涯。故國春風歸去盡。何人堪寄一枝花。
赤帝當年海上遊。三千幢蓋擁炎州。今來樹似離宮色。紅翠欹斜十二樓。
髣髴三株植世間。風光滿地赤城閒。無因秉燭看奇樹。長伴劉公醉玉山。

僊人詞二首

小隱山人十洲客。莓苔爲衣雙耳白。青編遺我忽隱身。暮雨虹蜺一千尺。
赤城門開六丁值。曉日已燒東海色。朝天半夜聞玉雞。星斗離離礙龍翼。

春日行

鸚鵡初鳴洲渚滿。龍蛇洗鱗春水煖。病多欲問山寺僧。湖上人傳石橋斷。

春歸去

九十春光在何處。古人今人留不住。年年白眼向黔婁。惟放躡螭飛上樹。

臨風歎

芙蓉樓中飲君酒。驪駒結言春楊柳。豫章花落不見歸。一望東風堪白首。

吳苑思

今人地藏古人骨。古人花爲今人發。江南何處葬西施。謝豹空聞采香月。

南昌途中

古道蚤緣蔓黃葛。桓伊冢西春水闊。村翁莫倚橫浦罾。一半魚鰕屬鶻獺。

閩川夢歸

千里潺湲建谿路。夢魂一夕西歸去。龍舫欲上巴獸灘。越王金雞報天曙。

題徐穉湖亭

伏龍山橫洲渚地。人如白蘋自生死。洪崖成道二千年。唯有徐君播青史。

宿天竺寺

一宿何期此靈境。五粒松香金地冷。西僧示我高隱心。月在中峰葛洪井。

贈野老

何年種芝白雲裏。人傳先生老萊子。消磨世上名利心。澹若巖間一流水。

送謝山人歸江夏

黃鶴春風二千里。山人佳期碧江水。攜琴一醉楊柳堤。日暮龍沙白雲起。

江上逢故人

十年蓬轉金陵道。長哭青雲身不早。故里相逢盡白頭。清江顏色何曾老。

雙桂詠

青冥結根易傾倒。沃州山中雙樹好。瑠璃宮殿無斧聲。石上蕭蕭伴僧老。

朝元引四首

帝燭熒煌下九天。蓬萊宮曉玉爐烟。無央鸞鳳隨金母。來賀薰風一萬年。
玉殿雲開露冕旒。下方珠翠壓鰲頭。天雞唱罷南山曙。春色先歸十二樓。
萬寓靈祥擁帝居。東華元老薦屠蘇。龍池遙望非烟拜。五色曕曩在玉壺。
寶祚河宮一向清。龜魚天篆益分明。近臣誰獻登封草。五岳齊呼萬歲聲。

